

POPERA GA YUDÍUGÜ GA YAXÔGÜXÛCAX ÜMATÜXÛ

Tupana rü Nanewa tamaã nidexa

1 ¹Nuxcûma ga Tupana rü muëxpüxcûna rü nagúxûraüxûácûma norü orearü uruügiwa tórü oxigûmaã nidexa, rü namaã nüxû nixu ga tacü nüxû na nanaxwaxexû. ²Natürü i ñomaücüü ya Tupana rü Nanewatama nixî i tamaã yadexaxû rü tüxû nüxû nacuaxëxû na ñuxácü tüxû nangüxëëchaüxû. Rü gumaxû nixî ga namuxû na naxüãxûcax ga ñoma ga naãne rü daxüguxû ga naãne rü üaxcü rü tauemacü rü woramacurigü rü ëxtagü. Rü ñuxüchi guma Nanena nanana ga guxûma ga yema na noxrü yiüxûcax. ³Rü Nanewa nixî i nüxû idauxû na ñuxácü namexëchixû i nüma ya Tupana. Rü nüma ya Nane rü Nanatü ya Tupanarüütama nixî. Rü ñuxma na guxûârü äëxgacü yiüxû ya Nane, rü guxûmaãma inacuax rü norü ore i poraxûmaã nanamu i guxûma na nüma nanaxwaxexûácûma na yiüxûcax. Rü nüma ya Nane nixî ga taxcax nayuxû na nüxû rüxoexûcax ga tórü pecadugü. Rü

yemawena rü Nanatüxütawa naxû i daxüguxû i naãnewa. Rü yéma Nanatüarü tügü necüwawa nayarüto erü guxûârü äëxgacü nixî i ñuxmax.

Tupana Nane rü guxûma i orearü ngeruügü i daxücüãxëtüwa nangëxma

⁴Rü ñuxma i nüma ya Nane rü guxûma i Tupanaârü orearü ngeruügü i daxücüãxârü yexera nixî rü naëtüwa nangëxma yerü yemaãcü nanaxuegu ga Nanatü. ⁵Rü ngëmaãcü nixî i ñuxma yerü ga Tupana rü taguma wüxi ga norü orearü ngeruüxû ñanagürü:

“Cuma nixî i Chaune. Rü ñuxma chanangoxëë na aixcûma Chaune quiüxû”,

ñanagürü. Rü taguma wüxi ga norü orearü ngeruüchiga ñanagürü:

“Choma nixî i Nanatü chiüxû rü nüma rü Chaune nixî”,

ñanagürü. ⁶Natürü yexguma ñoma ga naãnewa namuägu ga Nane ya guxüëtüwa ngëxmacü, rü ñanagürü ga Tupana:

“Chanaxwaxe i guxûma i chorü orearü ngeruügü i daxücüãx rü nüxû nicuaxüügü ya Chaune”,

ñanagürü. ⁷Rü yexguma norü orearü ngeruüğü ga daxüçüäxchiga yadeaxgu ga Tupana, rü ñanagürü:

“Choma chanaxwaxexüäcuma
chanamu i ngéma chorü orearü
ngeruüğü i chorü ngüxëeruüğü
ixīgüxü. Rü ngëxguma
chanaxwaxegu rü ñoma
buanecü rü ñoma üxiemarüü
chayaxīgüxë, rü
chanaporaexë na
naxügüäxüçax i chorü
ngüchaü”,

ñanagürü. ⁸Natürü yexguma Nanechiga yadeaxgu ga Tupana rü ñanagürü:

“Cuma rü chauxrüü Tupana quixi.
Rü guxügutáma äëxgacü quixi.
Rü aixcüma meä guxümaä
icucuax erü aixcümacü quixi.
⁹Rü nüxü cungechaü i guxüma i
ngéma nacüma i mexü natürü
naxchi cuxai i guxüma i ngéma
nacüma i chixexü. Rü
ngëmacax i choma na Cunatü
ya Tupana chiixü rü guxäétüwa
cuxü changëxmaxëë rü guxäärü
yexera cuxü chataäëxëë”,

ñanagürü. ¹⁰Rü yexgumarüü ta Nanexü ñanagürü ga Tupana:

“Cuma rü guxüärü Cori quixi. Rü
noxriarü ügügumama ga
yexguma natauxgutama ga
ñoma ga naäne, rü cuma nixi
ga cunaxüxü. Rü cumatama
nixi ga cunaxüxü ga üaxcü rü
tauemacü rü guxüma ga ëxtagü.
¹¹Rü guxüma i ngéma rü tá
nagux, natürü i cuma rü
guxügutáma cungëxmaëcha. Rü
guxüma i ngéma rü ñoma

naxchirurüü tá nangaue. ¹²Rü
ñoma wüxi i naxchiru i ngauxü
i ngéma itaxmarexürüü tá
ícunawogü i ñoma i naäne rü
guxüma i daxüwa nüxü idauxü.
Rü to i ngexwacaxüxümaä tá
cunaxüchicüü, ñoma wüxi i
naxchiru i ngauxü i
ngexwacaxüxümaä
ixüchicüüxürüü. Natürü i cuma
rü tá cunaxäxrügumaraxüëcha
rü tagutáma cuyu”,

ñanagürü ga Tupana. ¹³Rü Tupana rü
ñanagürü nüxü:

“iNuä chauxütawa rüto nüxmatáta
nüxü cuxü charüporamaëxë i
guxüma i curü uwanügü!”

ñanagürü. Natürü ga Tupana rü taguma
yema ñanagürü nüxü ga ngëxürüüxü ga
norü orearü ngeruüğü ga daxüçüäx.

¹⁴Rü guxüma i Tupanaärü orearü
ngeruüğü i daxüçüäx rü naäëgü i
Tupanaäxü puracüexü nixīgü. Rü numa
ya Tupana rü numa nanamugü na nüxü
yanangüxëëgüxüçax i guxüma i ngéma
duüxügü i Tupana naxwaxexü na
nayauxgüäxü i maxü i taguma gúxü.

**Tama name i nüxü taxoe i ngéma
maxü i Tupana tüxna uaxüxü**

2 ¹Rü nüxma na nüxü icuáxü na
guxüma i Tupanaärü orearü
ngeruüğü i daxüçüäxärü yexera yixü ya
Nane, rü ngëmacax tanaxwaxe i
yexeraäcü meä naga taxinüë i ngéma
ore i Nanechiga nüxü ixinüëxü, erü
tama tanaxwaxe na nüxü rüxoexü na
yaxögüxü. ²Rü yexguma tauta Nane ya
Cristuxü núma namuxgu ga Tupana, rü
norü orearü ngeruüğü ga daxüçüäxgüwa

duñxũgũmañ nũxũ nixu ga norũ mugũ na naga naxĩnũẽxũcax. Rũ yema mugũ rũ aixcũma napora yerũ guxũma ga yema duñxũgũ ga tama naga ñnũẽxũ, rũ yema mugũ nũxũ ixuxũãcũma Tupana nanapoxcue. ³Rũ yexguma yemaãcũ napoxcueãgu ga yema duñxũgũ ga tama naga ñnũẽxũ, ¿rũ ñuxũcũrũwa i yixema i naxchaxwa ibuxmũxũ na tama tũxũ napoxcuexũcax ega nũxũ ixoegu i ngẽma maxũ i mexẽchixũ i ñuxma Cristugagu tũxna naxuaxũxũ? Rũ dũcax, nũmatama ya tórũ Cori nixĩ ga nũxĩra naxunagũãxũ ga yema maxũ, rũ ñuxũchi yixcama nixĩ ga yema nũxũ ñnũẽxũ ga nũxĩ meã tũxũ nũxũ nacuxẽẽxũ na aixcũma yĩĩxũ i tũxũ nangẽxmaxũ i ngẽma maxũ ega nũxũ yaxõgũgu ya Cristu. ⁴Rũ nũmatama ga Tupana rũ ta taxcax nanangoxẽẽ na aixcũma yĩĩxũ i Cristugagu tũxũ na nangẽxmaxũ i ngẽma maxũ. Yerũ nũma ga Tupana rũ norũ duñxũgũwa nanaxũ ga muxũma ga mexũ ga taxũgũ rũ inanawex ga muxũma ga cuaxruũgũ. Rũ yexguma nagũxũraũãcũma tũxna namuãgu ga Naãẽ i Ûunexũ yema nũma nanaxwaxexũãcũma, rũ yexguma nixĩ ga wenaxãrũ tũxũ nũxũ nadauxẽẽxũ na aixcũma yĩĩxũ na Cristugagu tũxũ nangẽxmaxũ i ngẽma maxũ.

**Tupana rũ ñoma ga naãnewa
nanamu ga Ngechuchu ya Cristu na
taxrũ duñxũxũ yĩĩxũcax**

⁵Rũ ñuxma rũ guxũma i ngẽma mexũgũ i Cristugagu tũxũ ngẽxmaxũ i pemaã nũxũ tixuchigaxũ, rũ Tupana rũ taguma daxũcũãx ga norũ orearũ ngeruũgũna naxãga na namaã

inacuaxgũxũcax. Natũrũ duñxũgũxũ nixĩ ga namuxũ na namaã inacuaxgũxũcax ga guxũma ga yema mexũgũ. ⁶Ereũ wũxiwa i Tupanaãrũ ore i ñmatũxũwa rũ ñanagũrũ:

“Pa Tupanax, ¿rũ tacũ nixĩ i duñxũgũ rũ ngẽmacax nagu curũxĩnũxũ? ¿Rũ tacũwa name rũ ngẽmacax nũxũ cungechaũxũ? ⁷Rũ paxaãchi curũ orearũ ngeruũ ga daxũcũãxgũtũũwa cunayexmagũxẽẽ ga duñxũgũ, natũrũ i ñuxma rũ aixcũma cunaporaexẽẽ rũ cuyataxẽẽ. ⁸Rũ naxmexwa cunangẽxmaxẽẽ i guxũma i ñoma i naãnewa ngẽxmaxũ”,

ñanagũrũ i ngẽma orewa. Rũ yemaãcũ nixĩ ga Tupana ga duñxũgũmexẽwa nayexmagũxẽẽãxũ i guxũma i ñoma i naãnewa ngẽxmaxũ. Rũ nataxuma i tacũ i ñoma i naãnewa i tama naxmexwa nangẽxmaxẽẽxũ. Natũrũ woo na ngẽmaãcũ yĩĩxũ, rũ ñuxma rũ ta tauta nũxũ tadau na duñxũgũmexẽwa nangẽxmaxũ i guxũma i ñoma i naãnewa ngẽxmaxũ. ⁹Natũrũ nũxũ tadau ya Ngechuchu ya aixcũma guxũmaãma icuãcũ. Rũ yexguma Tupana ñoma ga naãnewa namuxgu rũ paxaãchi norũ orearũ ngeruũ ga daxũcũãxgũarũ ñaxtũwaama nanaxũxẽẽ. Natũrũ i ñuxma ya Tupana rũ poraãcũ Ngechuchuxũ nataxẽẽ rũ ãẽxgacũ ya tacũ nayaxĩxẽẽ yerũ ngũxũ ninge rũ guxũma ga duñxũgũcax nayu yerũ yemaãcũ nanaxwaxe ga Tupana yerũ tũxũ nangechaũ rũ tũxũ narũngũxẽẽchaũ. ¹⁰Yerũ ga Tupana rũ

nanaxwaxe na guxũma i naxãcügü nüxũ nangẽxmaxũcax i nachica i mexũ i naxũtawa. Rü yemacax ñoma ga naãnewa nanamu ga Ngechuchu ya Cristu na ngũxũ yangexũcax rü taxcax nayuxũcax na aixcũmaxũchi tüxũ nangẽxmaxũcax i maxũ i taguma gúxũ. Rü name nixĩ na yemaãcü naxũãxũ ga Tupana yerü nümatama nixĩ ga naxũãxũ ga guxũma rü namexwa nangẽxma na nũma nanaxwaxexũãcũma namaã inacũxũcax. ¹¹Rü Ngechuchu nixĩ ya tüxũ imexẽẽgücü na Tupanapexewa ixũünegũxũcax. Rü ñuxma i nũma ya Ngechuchu ya tüxũ imexẽẽgücü rü guxãma i yixema na tüxũ yaxũünexẽẽgũxũ rü wũxitama nixĩ ya Tanatü. Rü ngẽmacax nixĩ i nũma ya Ngechuchu ya Tupana Nane, rü tama taxcax naxãnexũ na naẽneẽgũmaã tüxũ naxuxũ. ¹²Erü Tupanaãrũ ore i ümatüxũwa rü ñanagürü ga Nane:

“Rü chaueneẽgũxũ tá nüxũ chacuaxẽe i cuchiga, Pa Chaunatüx. Rü norü ngutaquexegüwa rü tá cuxcax chawiyae na ngẽmaãcü cuxũ chicuaxũxũcax”,

ñanagürü. ¹³Rü toxnamana i Tupanaãrũ ore i ümatüxũwa rü ñanagürü ta ga Nane:

“Cuxũ chayaxõ, Pa Chaunatüx, erü nüxũ chacuax rü tá choxũ curüngũxẽe”,

ñanagürü. Rü ñanagürü ta:

“Rü daxe chixĩ, Pa Chaunatüx, namaã i cuxacügü i chaueneẽgü i choxna cumugũxũ”,

ñanagürü. ¹⁴Rü nũma ga Ngechuchu nüxũ nacuax na duũxũgü ixĩgũxũ, rü

yemacax ñoma ga naãnewa naxũ na taxrũũtama naxãmachixũcax rü naxãgũxũcax na yemaãcü taxcax nayuxũcax na yema norü yumaã nüxũ naporamaẽxũcax ga Chataná ga noxri nüxũ yexmaxũ ga pora na tüxũ iyanatauxexẽẽxũcax. ¹⁵Rü yemaãcü nanaxü ga Ngechuchu na Chatanámxẽwa tüxũ íngangũxũxẽẽxũcax ya guxãma ya yíxema noxri naxcax muũẽxẽ ga na tayuexũ. ¹⁶Rü yemacax ñoma ga naãnewa nangu ga Ngechuchu na taxcax nayuxũcax i guxãma i yíxema na Abráũriũ yaxõgũxũ. Rü tama daxũcũãx i orearü ngeruũgũcax nayu, natürü taxcax nixĩ ga nayuxũ. ¹⁷Rü nũma ga Ngechuchu rü nanaxwaxe na yixema i naẽneẽgü ixĩgũxũrũũtama nügü na yaxĩxẽxũ na yemaãcü aixcũma mecũmacü ya nüxũ ingechaũtũmũũgücü ya tórü chogürũ yĩxũcax i Tupanapexewa. Rü yemacax nixĩ ga nügü inaxãxũ rü nayuxũ na yemaãcü Tupana duũxũgũaxũ nüxũ ngechaũxũcax i norü pecadugü. ¹⁸Rü yema nümatama ngũxũ na yangexũ ga yexguma Chataná nüxna ñnũgu, rü ngẽmacax i ñuxma rü nüxũ nacuax na tüxũ nangũxẽẽxũ ya yíxema Chataná tüxna ñnũxẽ.

Ngechuchu rü Moíchéetüwa nangẽxma

3 ¹Rü ñuxma Pa Chaueneẽgü ya Tupanapexewa Üünegũxe, rü pexũ nixĩ ya Tupana iyadexechixũ na norü duũxũgü pixĩgũxũcax. Rü ngẽmacax name nixĩ i aixcũma meã nagu perũxĩnüe ya Ngechuchu ya Cristu ya Tupana núma namucü. Rü nũma ya

Ngechuchu nixĩ i tórü chogürüĩ i Tupanapexewa tüxũ ixüünexẽeci. Rü yimaãxũ nixĩ i yaxögüxũ. ²Rü Tupana rü marü Ngechuchuxũ naxuneta na naxüãxũcax ga yema puracü ga Tupana nüxna äxũ. Rü nüma ga Ngechuchu rü aixcüma Nanatüga naxĩnũ rü nayanguxẽẽ ga yema puracü yexgumarüĩ ga Moĩché meãma na naxüxũ ga yema puracü ga Tupana nüxna äxũ na nüxna nadauxũcax ga Tupanaärü duũxũgü ga Yudfugü. ³Rü woo ga noxri rü Moĩchéxũ nitaégacüüxẽẽ ga Tupana, natürü i ñuxma rü Moĩchéarü yexera Ngechuchuxũ nixĩ i yataégacüüxẽẽxũ. Rü wüxi ya ĩpata ya ngexwacax ixüxũnerüĩ nixĩ, erü woo ngẽma ĩpatamaã tataãẽ, natürü ngẽma yexeraãcü nüxũ icuaxüüxũ nixĩ i ngẽma ĩpataarü üruũ. ⁴Rü guxũnema ya ĩ rü nüxũ nangẽxma i norü üruũ. Natürü guxũma i tacü i ngẽxmaxũ, rü Tupana nixĩ ya naxücü. ⁵Rü Moĩché rü wüxi ga Tupanaärü duũxũ ga aixcüma mexũ nixĩ yerü meã nüxna nadau ga Tupanaärü duũxũgü ga Yudfugü, yema Tupana namaã nüxũ ixuxũrüũ. Rü nüma ga Moĩché nixĩ ga yema duũxũgümaã nüxũ yaxuxũ ga ñuxãcü Tupana tá yixcüra nüxũ na rüngüxẽẽxũ. ⁶Natürü nüma ya Ngechuchu rü Moĩchéarü yexera nixĩ erü Tupana Nanexũchi nixĩ. Rü nüma nixĩ i nüxna nadauxũ i guxũma i ngẽma Tupanaärü duũxũgü ixügüxũ. Rü yixema rü ta Tupanaärü duũxũgü tixĩgü ega aixcüma Ngechuchuxũ yaxögügu rü taguma nüxũ rüxoegu. Rü Tupana nanaxwaxe na guxũguma Ngechuchumaã itaãẽgüxũ erü nüxũ

tacuax na wüxi i ngunexũ rü tá taxcax nataeguxũ na wüxiwa namaã ingẽxmagüxũcax.

Tupanaärü duũxũgü rü tá inarüngũẽ

⁷⁻⁸Rü ngẽmacax i Tupanaärü ore i ümatüxũwa rü ñanagürü i Naãẽ i Üünexũ:

“Rü ñuxma na nüxũ pexĩnüẽxũ i ngẽma Tupana pemaã nüxũ ixuxũ, rü tama name na nüxũ pexoexũ, yexgumarüĩ ga na naxügüãxũ ga yema duũxũgü ga Tupanaxũ ügüxũ rü tama naga ĩnüẽxũ ga yexguma Moĩchéwe naxĩgu ga yema naãne ga ngextá taxúema íxãpataxũwa”.

⁹Rü yemacax ga Tupana rü ñanagürü:

“Rü yema nixĩ ga chixexũ naxügüxũ ga nuxcümaũgüxũ ga perü oxigü yerü choxũ naxügü yerü tama choxũ nayaxógüchaũ. Rü yemaãcü nanaxügü woo 40 ga taunecügu nüxũ na nadaugüxũ ga yema mexügü ga üünexũ ga napexewa chaxüxũ. ¹⁰Rü yemacax namaã chanu ga yema duũxũgü, rü ñacharügü nüxũ: ‘Pema rü guxũguma chixexũguxicatama perüĩnüẽẽcha, rü taguma penaxüxchaũ i ngẽma chanaxwaxexũ na penaxüxũ’, ñacharügü nüxũ. ¹¹Rü yemacax nixĩ ga namaã chanuxũ ga yema duũxũgü, rü aixcümaxũchi namaã nüxũ chixu na täütama yema naãne ga noxri namaã

ichaxunetaxüwa nangugüxü na
ngëxma nangüëxüçax”,

ñanagürü ga Tupana. ¹²Rü ñuxma Pa
Chaueneëgüx, rü name nixí i pegüna
pedaugü na tama ngürüächí pechixearü
maxüáxüçax, rü ngëmagagu na nüxü
perüxoexü na Tupana ya maxücüaxü na
peyaxögüxü. ¹³Natürü ñuxma pexü
natauxchagu, rü name nixí na
wüxichigü pegüaxü penangücháxüëëxü
i guxü i ngunexügu na taxúema i
petanüwa Tupanaxü taxoxüçax nagagu i
ngëma pecadu i pexü womüxëëcháxü.
¹⁴Rü Cristuaxü tayaxögü rü yemaäcü
tanayaxu ga tórü maxü ga noxrix. Rü
ngëxguma noxrirüütama guxüguma meä
nüxü yaxögüechagu rü tama nüxü
rüxoegu, rü tá namaä tüxü nangëxma i
tachica i daxügüxü i naänewa. ¹⁵Natürü
ñuxma nixí i namexü na meäma
yaxögüxü. Rü ngëmacax i Tupanaärü
ore i ümatüxüwa rü ñanagürü:

“Rü ñuxma na nüxü pexínüëxü i
ngëma Tupana pemaä nüxü
ixuxü, rü tama name na nüxü
pexoexü, yexgumarüü ga na
naxügüäxü ga yema duüxügü
ga tama Tupanaga ñnüëxü ga
yexguma Moïchéwe naxixgu ga
yema naäne ga ngextá taxúema
íxãpataxüwa”,

ñanagürü. ¹⁶¿Rü texëgü tixí ga guxema
nüxü ñnüëxë ga yema Tupana tümamaä
nüxü ixuxü, rü ñuxüchi tama Tupanaga
ñnüëxë? Rü pemaä nüxü chixu rü
yemagü nixí ga yema duüxügü ga
Moïché Equituanewa ínguxüxëëxü.

¹⁷¿Rü texémaä nixí ga nanuxü ga
Tupana ga 40 ga taunecügu? Rü pemaä
nüxü chixu rü namaä nanu ga yema

duüxügü ga chixexü ügüxü. Rü yemacax
yema nachica ga ngextá taxúema
íxãpataxügu nayue. ¹⁸¿Rü texëgümaä
nixí ga aixcümaxüchi inaxunetaxü ga
Tupana na täütama yema naänewa
nangugüxü na yexma nangüëxüçax? Rü
pemaä nüxü chixu, rü yemagü nixí ga
yema duüxügü ga tama naga ñnüëxü.
¹⁹Rü ngëmawa nüxü tacuax na
taxucürüwama yema naäne ga noxri
Tupana namaä ixunetaxüwa nangugüxü
ga yema duüxügü, yerü tama nüxü
nayaxögü.

4 ¹Rü ngëmacax i ñuxma na Tupana
tamaä ixunetaxü na nügüxütawa tá
tüxü yachocuxëëxü na ngëxma
rüngüëxüçax, rü tanaxwaxe i taxuäëgü,
na tama ngürüächí wüxie i tatanüwa
tama ngëxma taxücuxü. ²Erü ñuxma i
yixema rü marü nüxü taxínüë i
Tupanaärü ore i mexü, yexgumarüü ga
yema nuxcümaügüxü ga duüxügü nüxü
na naxínüëxü. Natürü nümagü ga yema
duüxügü rü taxuwama nüxü name ga
nüxü na naxínüëxü ga yema ore yerü
tama yema naga ñnüëxürüü aixcüma
nüxü nayaxögü. ³⁻⁴Natürü i yixema na
yaxögüxü, rü tá aixcüma Tupanaxütawa
tichocu na ngëxma rüngüëxüçax. Rü
wüxiwa i Tupanaärü ore i ümatüxüwa
rü ngüxchigaarü ngunexüchigaxü nixu,
rü ñanagürü:

“Rü 6 ga ngunexügu nixí ga
naguxëëäxü ga norü puracü ga
Tupana. Rü yexguma norü 7 ga
ngunexüwa nanguxgu rü
guxüma ga norü puracüna
narüngü”,

ñanagürü. Rü nuxcüma ga Tupana rü
nanaxwaxe na nangüëxü ta ga yema

nuxcūmaũgũxũ ga tórũ oxigũ ga
Moíchéwe ruxĩxũ. Natürũ ga nūmagũ rü
tama nũxũ nayaxögüchaũ rü tama naga
naxĩnũ. Rü yemacax ga Tupana rü
norũ ore i ũmatũxũwa rü ñanagürũ:

“Yema duũxũgũ rü tama choxũ
nayaxögũ rü yemacax namaã
chanu rü aixcūmaxũchi namaã
nũxũ chixu na täütáma yema
naãne ga namaã
ichaxunetaxũwa nangugũxũ na
ngẽxma nangũẽxũcax”,

ñanagürũ. ⁵⁻⁶Rü yemaãcũ ga yema
duũxũgũ ga nũxĩra nũxũ ñnũxũ ga
Tupanaãrũ ore i mexũ, rü tama nawa
nichocu ga yema nachica ga Tupana
namaã nũxũ ixuxũ, yerũ tama naga
naxĩnũ. Rü ngẽmacax nixĩ i Tupanaãrũ
ore i ũmatũxũwa i ñaxũ:

“Ngẽma duũxũgũ i tama chauga
ñnũxũ rü täütáma ngẽma
nachica i namaã
ichaxunetaxũwa nichocu na
ngẽxma nangũẽxũcax”,

ñaxũ. Natürũ ñuxma rü ta nangẽxma i
nachica i tūmacax ya yíxema ngẽxma
Tupanaxũtagu chocuchaũxẽ na ngẽxma
tarüngũẽxũcax. ⁷⁻⁸Rü ngẽma nachica i
ngextá nagu nangũẽxũ i duũxũgũ rü
tama yema naãne ga nuxcūmaũgũxũ ga
tórũ oxigũxacũgũ tūmaãrũ aẽxgacũ ga
Yochuémaã tayauxgũxũ nixĩ. Yerũ
yexguma chi yema naãne yixĩgu, rü
Tupana rü täũ chima wenaxãrũ nũxũ
naxuneta ga to ga ngunexũ na nagu
naxũtawa yachocuxũcax na ngẽxma
nangũẽxũcax i duũxũgũ. Rü yemacax ga
Tupana rü wenaxãrũ nũxũ naxuneta i
wũxi i to i ngunexũ na naxũtawa
yachocuxũcax i duũxũgũ na ngẽxma

nangũẽxũcax. Rü ngẽma ngunexũ rü
ñuxma nixĩ. Rü yemacax ga Tupana rü
mucūma ga taunecũ ga Moíchéwena rü
Dabímaã nũxũ nixu ga yema norũ ore
ga ũmatũxũ i ñaxũ:

“Rü ñuxma na nũxũ pexĩnũẽxũ i
ngẽma Tupana pemaã nũxũ
ixuxũ, rü tama name na nũxũ
pexoexũ”,

ñaxũ. Rü yematama nixĩ ga ore ga
marũchirex pemaã nũxũ chixuxũ. ⁹Rü
ngẽmacax i ñuxma rü ta nangẽxma i
wũxi i nachica i ũnuxũ i nagu tá
aixcūma nangũẽxũ i ngẽma Tupanaãrũ
duũxũgũ ixĩgũxũ. ¹⁰Rü yíxema
Tupanaxũtawa ichocuxe na ngẽxma
tarüngũẽxũcax, rü nũxna tarüngũẽ i
guxũma i tūmaãrũ puracũgũ
yexgumarũũ ga Tupana rü nũxna na
nangũxũ ga norũ puracũgũ ga yexguma
naãne naxĩxguwena. ¹¹Rü ngẽmacax
tanaxwaxe i meã tayaxögũ rü naga
taxĩnũ na ichocuxũcax i ngextá Tupana
tũxũ írüngũẽxũxũwa. Erũ tama
tanaxwaxe na texẽ ngürũãchi yema
nuxcūmaũgũxũ ga duũxũgũ ga tama
Tupanaga ñnũxũrũ norũ orexũ na
taxoxũ. ¹²Erũ Tupanaãrũ ore rü namaxũ
rü naporaxũchi. Rü wũxi i tara i
guxũcũwawa meã waixmaguxũãrũ
yexera nixĩ na natéxũ. Erũ ngẽma ore rü
tawa nixũcu ñuxmata taãewa nangu, rü
ñuxmata nawa nangu i ngẽma
wũxichigũ nagu rüxĩnũxũ. Rü ngẽmaãcũ
meãma nanangoxẽẽãma i guxũma i
ngẽma yixicatama nagu rüxĩnũxũ rü
tũxũ ngũchaũxũ. ¹³Rü nataxutáma i
tacũ i Tupana ũxũ i tá naxchaxwa nũgũ
icũxũ erũ napexewa rü guxũma meã
nangox. Rü guxũxũ nadau rü guxũxũ

nacuax ya yima tá tuxna cacü na namaã nüxü ixuxüçax i tórü maxüchiga.

**Ngechuchu rü mecüxüchi ya tórü
ngüxëëruü nixi i Tupanapexewa**

¹⁴Ngechuchu ya Tupana Nane rü mecüxüchi ya tórü ngüxëëruü nixi i Nanatüpepexewa. Rü ñuxma rü daxüguxü i nañewa i Nanatüxütawa nangëxma na ngëma taétüwa nachogüxüçax. Rü ngëmacax tanaxwaxe i guxüguma nüxü tayaxögüiecha rü taguma nüxü tarüxoe. ¹⁵Rü nüma ya Ngechuchu rü aixcüma nüxü nacuax na tuxü nangüxëëxü erü nüxü nacuax na ñuxäcü tuxü naguxchaxü i ngëxguma Chataná tuxna ñügu rü pecadugu tuxü nanguxëëchaügu, yerü nüxna rü ta naxünu ga Chataná, ngëma tuxna na naxünuüü. Natürü nüma ga Ngechuchu rü taguma chixexü naxü. ¹⁶Rü ñuxma na tuxü nangëxmaxü ya tórü ngüxëëruü ya Ngechuchu, rü name nixi i tama imuëäcüma nüxna tangaicamagü ya tórü äëxgacü ya Tupana ya tuxü ngechaücü. Rü tanaxwaxe na ngëmaäcü nüxna ingaicamagüxü na nüxü ingechaütümüügüxüçax rü tuxü nangechaüäcüma tuxü nangüxëëxüçax i ngëxguma guxchaxügü tuxna ngaicamagu.

5 ¹Nuxcüma ga Tupana rü Moichémaã nüxü nixu na Aráü yixüçax ga Yudüguärü paigüeru ixicü na guma duüxügüétüwa chogüxüçax ga Tupanapexewa. Rü guxüma ga yema Aráüwena ügüxü ga paigüeru rü duüxügütanüwa nüxü naxunetagu na yema duüxügüärü ngüxëëruü yixüçax

ga Tupanapexewa rü Tupanana naxäxüçax ga ämaregü rü Tupanacax nadaiäxüçax ga naxünagü na yemaäcü nüxü nüxü nangechaüxüçax ga norü pecadugü. ²Natürü ngëma paigüeru rü guxüma i duüxügüütama nixi na pecadugu nanguxü. Rü ngëmacax nüxü nacuax na ñuxäcü yaxna namaã naxünuü i duüxügü i ngëxguma naëchitamare pecadu naxüegu rü tama aixcüma Tupanawe naxüxgu. ³Rü ngëma paigüeru rü tama ngëma duüxügüärü pecaduçaxicatama nixi i nadaiäxü i naxünagü, natürü nanaxwaxe i noxrütama pecaduçax rü ta na nadaiäxü i naxünagü na ngëmaäcü Tupana nüxü nüxü nangechaüxüçax i ngëma pecadugü. ⁴Rü taxüema tügütama tingucuchixëë na paigüeru tiixüçax. Natürü Tupana nixi ya tuxü unetacü rü tuxna naxäcü i ngëma puracü na paigüärü äëxgacü tiixüçax, yexgumarüü ga Tupana rü Aráüxü na yangucuchixëëxüü na paigüeru yixüçax. ⁵Rü yexgumarüü ga Ngechuchu rü tama nügütama ningucuchixëë na Tupanapexewa tórü ngüxëëruü i paigüeru yixüçax. Natürü Tupana nixi ga yangucuchixëëcü. Yerü Tupanatama nixi ga nüxü ñacü:

“Cuma nixi i Chaune. Rü ñuxma
chanangoxëë na Chaune
quiixü”,

ñacü. ⁶Rü toxnamana i Tupanaärü ore i ümatüxüwa rü ñanagürü ta:

“Cuma nixi i guxügütama duüxügüärü
ngüxëëruü i paigüeru quiixü,
guma pai ga Melquisedérüü”,

ñanagürü. ⁷Rü yexguma Cristu ñoma ga nañewa maüxgu, rü poraäcü

nayumüxê rü tagaãcü rü naxauxãcü
 Tupanana naca na nüxü nangüxêëxüçax
 na naga naxinüxüçax. Rü yemaãcü
 nanaxü ga Cristu, yerü Tupana rü
 napora na nüxü nangüxêëxüçax na tama
 yuxü namuüxüçax. Rü Tupana rü
 Cristuxü naxinü yerü nüma ga Cristu rü
 aixcüma Tupanaga naxinü. ⁸Rü nüma
 ga Cristu rü woo Tupana Nane na yiixü,
 rü poraãcü ngüxü ninge na yemaãcü
 nüxü nacuáxüçax na ñuxäcü yaxna
 namaã naxinüxü. Rü yemaãcü aixcüma
 Tupanaga naxinü. ⁹Rü yemaãcü
 nayanguxêë ga guxüma ga yema puracü
 ga Nanatü nüxna äxü. Rü yemaçax
 curuchagu nayu na guxäma ya texé ya
 naga ñnüxêärü maxêëëruü na
 yiixüçax. ¹⁰Rü Nanexü nixi ga
 naxunetaxü ga Tupana na guxügutäma
 nügüpepexewa tórü ngüxêëruü i paigüeru
 yiixüçax yexgumarüü ga pai ga
 Melquisedé ga norü yumüxëwa
 nuxcümaücü ga tórü oxü ga Abráüçax
 Tupanana çacü na guma Abráüxü
 nangüxêëxüçax ga Tupana.

**Wüxi i äücümaxüchixü nixi na nüxü
 rüxoexü na yaxögüxü**

¹¹Rü ñuxma rü toxü nangëxma i
 muxüchixüma i ore i Cristuchiga ixixü i
 pemaã nüxü tixuxchaüxü. Natürü
 naguxchaxüchi na meäma pemaã
 tanangoxêëxü i ngëma, erü pema rü
 tama nüxü pecuáxchaü. ¹²Rü marü
 ñuxgumama nüxü na pecuáxü i
 Tupanaärü orechiga, rü pema rü chi
 marü namaã pengüxêëtae. Natürü i
 pema rü ñuxma rü ta penaxwaxe na
 wena pemaã tanangoxêëxü i ngëma
 Tupanaärü ore i tauxchaxü i nawa

inaxügüxü na Tupanachigaxü icuáxü.
 Rü ngëmaãcü i pema, rü
 õxchanagürüütama pixigü. Erü wüxi i
 õxhana rü naëgünenixü ya tauxchaãcü
 yaxaxüne nixi ya nanaxwaxene. Rü
 ngëxgumarüü pixigü i pema i ñuxmax,
 erü penaxwaxe na wenaxärü pemaã
 nüxü tixuxü ga yema ore ga marü
 pemaã nüxü tixuchiréxü na ñuxäcü
 Cristuxü peyauxgüxü. Erü tama nüxü
 pecuaxgüéga i guxüma i ngëma
 Tupanaärü ore i yexeraãcü tamaã nüxü
 ixuxü i Cristuchiga na ñuxäcü Tupana
 nanaxwaxexü na naga pexinüëxü. ¹³Rü
 yíxema yaxõxê ya tama nüxü cuaxégaxe
 na ñuxäcü Tupanacax tamaxüxü, rü
 wüxi i õxhana i maixürüü tixi. Rü
 ngëmaãcü pixigü i pemax. ¹⁴Natürü
 yíxema yaxõxê ya tümamaã yaxúxe na
 tanangugüxü na tacü yiixü i nguxêëtae i
 mexü rü tacü yiixü i nguxêëtae i
 chixexü, rü aixcüma nüxü tacuax na
 ñuxäcü Tupanacax tamaxüxü. Rü
 yíxema rü ñoma wüxi i duüxü i yaxü i
 namachimaã äwemüxürüü tixi. Natürü i
 pema rü tama ngëmaãcü pixigü.

6 ¹Rü ngëmacax name nixi i
 yexeraãcü tingüetanü na aixcüma
 meã nüxü icuáxüçax i Cristuchiga. Rü
 tanaxwaxe na nüxü ichopetüxü ga yema
 ore ga nawa inaxügüxü na
 Cristuchigaxü icuáxü. Rü täütäma
 yeüçürü yema ore ga nawa
 inaxügüxüchiga tidexagüecha. Rü
 taxucaxma tüxcüü wena pemaã nüxü
 tixu na nüxü perüxoexüçax na nagu
 pexixü i ngëma mugü ga Moiché
 ümatüxü i tama tüxü maxêëëxü. Rü
 ngëxgumarüü ta taxucaxma tüxcüü
 wena pemaã nüxü tixu i nachiga na

ñuxäcü Tupanaäxü yaxögüxü. ²Rü ngëxgumarüü ta taxucaxma tüxcüü wena pexü tangúexë na ñuxäcü Tupanacax íbaiüxü rü ñuxäcü duüxügü ingögiäcuma namaã iyumüxëxü. Rü ngëxgumarüü ta taxucaxma tüxcüü wena pexü tangúexë na ñuxäcü tá wena namaxëxü i duüxügü i yuexü rü ñuxäcü naãneärü guxgu rü Tupana tá wüxichigü i duüxügüna çaxü na ñuxäcü namaxëxü i ñoma i naãnewa. ³Rü ngëmacax i ñuxma rü ngëxguma Tupana tama tüxna nachuxgu rü tanaxwaxe i yexeraäcü tingúeetanü na aixcüma guxüma i Cristuchigaxü icuáxüçax rü nüxü na icuáxüçax na aixcüma ngëma numa nanaxwaxexüäcüma meã naxçax na imaxëxü. ⁴⁻⁵Natürü ngëxguma chi wüxie Cristuxü yaxugü, rü chi meãma Tupanaxü tacuaxgu, rü chi Naã i Üünexüxü tayaxgu, rü chi nüxü tacuaxgu na ñuxäcü namexü i Tupanaärü ore rü ñuxäcü na namexü i daxügüxü i naãne, rü name nixi i taxuã. ⁶Erü ngëxguma chi ngëmaäcü meã tayaxögüxü i noxrix rü ñuxüchi Cristuxü ítataxüchixgu, rü marü taxucüriwama texé wenaxärü Tupanacax tüxü tataeguxë. Erü ngëxguma ngëmaäcü ítanataxüchixgu ya Tupana Nane, rü ñoma wena curuchawa tayapotaxüüü tayaxixë, erü guxü i duüxügüpexewa äne nüxü tingexë. ⁷Rü dücax, wüxi i naãne i pucü nagu nguxü rü meãma nanetü nawa nayae tümacax ya yíxema nagu üanexë, rü Tupana rü namaã nataã i ngëma naãne. ⁸Natürü ngëxguma chi ngëma naãne rü tuxu rü natüanegü i

chixexü nawa yaegu, rü Tupana rü chixexü tá namaã nixugü rü tá üxüwa nayagu i guxüma i nawa yaexü. Rü ngëxgumarüü tá tixi ya yíxema Cristuxü ítaxe.

Ítananguxë na nayauxgüxü i maxü i taguma güxü rü ngëmacax tama nüxü tarüxoe na yaxögüxü

⁹Natürü, Pa Chaueneëgü ya Pexü Tangechaügüxe, rü woo ngëmaäcü pemaã tidexagügu, natürü aixcüma nüxü tacuax na tama ngëma duüxügü i nüxü rüxoexüüü pixigüxü. Erü pema rü pexü nangëxma i maxü i taguma güxü, rü Tupana rü tá aixcüma poraäcü pexü narüngüxë na naxçax pemaxëxüçax. ¹⁰Erü numa ya Tupana rü aixcümacü nixi. Rü numa rü täütáma nüxü inayarüngüma ga yema mexü ga pexüxü rü ñuxäcü taeneëgü i yaxögüxüxü na pengechaügüxü ga yexguma nüxü perüngüxëëgügu, ngëma ñuxma ípenaxüürüütama. ¹¹Rü ñuxma rü tanaxwaxe i wüxichigü i pema rü ngëmaäcü noxrüü mexü i perü ngüchaümaã nüxü perüngüxëëgüecha i taeneëgü ñuxmatáta wena núma naxü ya Cristu. Rü tanaxwaxe na ngëmaäcü pemaxëxü na düxwa aixcüma Cristuxütawa pengugüxü ngëma ípenanguxëëxüüü. ¹²Rü tama tanaxwaxe na nüxü perüxoetanücüxü na Cristuwe perüxixü. Natürü tanaxwaxe i naxrüü pixigü i ngëma duüxügü i guxüguma meã yaxögüäcüma Cristuwe rüxiamaxü rü nayauxgüxü i guxüma i ngëma mexügü ga Tupana namaã ixunetaxü. ¹³Rü dücax, yexguma törü öxi ga Abráümaã inaxunetagu ga

Tupana rü nügüégagutama inaxuneta, yerü tataxuma ga texé ga norü yexera ixixé na tumaégagu inaxunetaxüçax.

¹⁴Rü numa ga Tupana rü ñanagürü nüxü ga Abráü:

“Rü aixcümäxüchi tá poraäcü cuxü charüngüxé. Rü tá cuxü nangëxma i muxüchixütama i cutaagü”,

ñanagürü nüxü. ¹⁵Rü Abráü rü meäma ñananguxé ga guma nane ga Tupana namaä ixunetacü. Rü yemaçax nabu ga guma nane ga Ichaä ga Tupana namaä nüxü ixucü. ¹⁶Rü ngëxguma duüxügü tacüçax ixunetägü, rü to i norü yexera ixixüégagu inaxunetägü. Rü wüxicana tacüçax ngëmaäcü inaxunetägü, rü nüxü tacuax rü aixcüma tá nanaxügü i ngëma naxçax inaxunetägüxü, rü marü taxucürüwama yeücürü nachiga nidexagüecha. ¹⁷Rü yemaçax ga Tupana rü yexguma inaxunetagu namaä ga yema duüxügü ga nayauxgüxü tá ga yema ngüxé ga Tupana nüxna äxchaüxü, rü nügüégagutama inaxuneta, yerü nanaxwaxe na meäma nüxü nacuaxgüxü na aixcüma tá yanguxéäxü rü tagutäma naxüchicüüäxü ga yema namaä inaxunetaxü. ¹⁸Rü nüxü tacuax rü ngëxguma tacüçax nügüégagu inaxunetagu ya Tupana, rü taxucürüwama tüxü nawomüxé rü nanaxüchicüü i ngëma. Rü ñuxma i guxäma i yixema na Tupanaçax ibuxmüxü na tüxü nangüxéäxüçax rü tüxü namaxéäxüçax, rü numa ya Tupana rü nügüégagu tamaä inaxuneta na ngëmaäcü tá tüxü nangüxéäxü. Rü ngëmaäcü tüxü nanangüchaüxé rü

tüxü narüngüxé na nüxü icuáxüçax na aixcüma tá nayauxgüxü i ngëma maxü i taguma güxü i tamaä inaxunetaxü. ¹⁹Rü ñuxma na ñanguxéäxü na aixcüma tá nayaxuxü i ngëma maxü i taguma güxü, rü taxuçaxma taxoegaäëgü, erü nüxü tacuax na aixcüma daxügüxü i naänewa i Tupana íngëxmaxüwa tá ingügüxü. ²⁰Rü ngëma nangëxma ya Ngechuchu i ñuxma yerü nüxira yexma naxücu na Tupanapexewa taétüwa nachogüxüçax. Rü ngëmaäcü guxüguma tóru ngüxéëruü i paigüeru nixí, guma Melquisedé ga Tupanapexewa Abráüëtüwa chogüçürüü.

Ngechuchu rü guma nuxcümäüçü ga pai ga Melquisedériütama nixí

7 ¹Rü guma Melquisedé rü ñäne ga Charéüärü äëxgacü nixí ga yexguma namaüxgu ga Abráü. Rü numa ga Melquisedé, rü duüxügüaruü pai nixí ga Tupanapexewa. Rü yexguma Abráü rü to ga nachüüäneärü äëxgacügümaä nügü nadaixgu rü nüxü nayexeragu, rü Melquisedé rü namawa Abráüpexegu nayangu ga yexguma Abráü napataçax taegugu. Rü numa ga Melquisedé rü nayumüxé na Tupana Abráüxü rüngüxéäxüçax. ²Rü Abráü rü nüxü nayexma ga guxüma ga yemaxügü ga yema äëxgacügü ga namaä nügü nadaixüna napuxüxü. Rü yemawa ñanaxüxüchi ga yema Tupanana üxü, rü Melquisedéna nanaxä. Rü ngëma naéga i Melquisedé rü Äëxgacü ya Ixaixcümäcü ñaxüchiga nixí. Rü norü ñäne ga Charéü rü Taäëxéëruü ñaxüchiga nixí. Rü ngëmaçax i naéga i Melquisedé rü Äëxgacü ya Taäëxéëruü

ñaxũchiga ta nixĩ. ³Rũ Tupanaãrũ ore ga nuxcũma ñmatũxũwa rũ tama nũxũ nixu na texé tiĩxũ ga nanatũ rũ naẽ rũ norũ oxigũ ga Melquisedé. Rũ ngẽxgumarũũ ta tama nũxũ nixu i norũ buxchiga rũ norũ yuxchiga. Rũ ngẽmacax Tupana Nanerũũ guxũguma duũxũgũarũ ngũxẽẽruũ ya pai nixĩ i Tupanapexewa. ⁴Rũ ñuxma rũ name nixĩ i nagu perũxĩniũ na ñuxãcũ aixcũma ãẽxgacũ ya tacũ yĩĩxũ ga Melquisedé. Yerũ nuxcũmaũcũ ga tórũ oxĩ ga Abráũ rũ Melquisedéna nanaxã ga yema Tupanana ùxũ ga natanũwa ga yema yemaxũgũ ga togũ ga ãẽxgacũgũna napuxũxũ. Rũ ngẽmawa nũxũ tacuax na Tupanapexewa tórũ oxĩ ga Abráũarũ yexeracũ yĩĩxũ ga Melquisedé. ⁵Rũ ñuxma i Yudũgũ, rũ guxũma i norũ ngẽmaxũwa ínanaxũxũchigũ i ngẽma Tupanana ùxũ, rũ ñuxũchi norũ paigũna nanaxã yerũ yemaãcũ nixĩ ga namuãxũ ga yema mugũ ga Moĩché ñmatũxũ. Natũrũ guxũma i ngẽma paigũ rũ Lebítaagũ nixĩgũ. Rũ nũma ga Lebĩ rũ guxũma i Yudũgũrũ Abráũta nixĩ. Rũ ngẽmaãcũ i ngẽma Yudũgũ rũ norũ paigũna nanaxã i ngẽma Tupanana ùxũ, woo natanũxũ na yĩĩxũ i ngẽma paigũ. ⁶Natũrũ ga Melquisedé rũ woo tama Lebítaa nixĩ, natũrũ Abráũmẽxẽwa nanayaxu ga yema Tupanana ùxũ. Rũ nũxũ tacuax na Abráũ yĩĩxũ ga noxri nayaxucũ ga Tupanaãrũ uneta. Rũ nũma ga Melquisedé rũ Tupanana naca na Abráũxũ nangũxẽẽxũcax ga Tupana. ⁷Rũ guxãma meãma nũxũ tacuax rũ ngẽxguma texé toguẽcax Tupanana caxgu na tũxũ nangũxẽẽxũcax, rũ

Tupanapexewa rũ yĩxema nũxna çaxe rũ ngẽma togũ i naxcax ítaçaxũãrũ yexera tixĩ. Rũ ngẽmaãcũ nũxũ tacuax na Abráũarũ yexera yĩĩxũ ga Melquisedé i Tupanapexewa. ⁸Rũ ñuxma i nuã tatanũwa rũ ngẽma paigũ i ngĩxũ yauxgũxũ i ngẽma dñẽru i Tupanana ùcũ, rũ duũxũgũmare nixĩgũ rũ tá nayue. Natũrũ ngẽxguma Melquisedéchiga yadeaxgu i Tupanaãrũ ore, rũ ñoma namaũxgũrũ nixĩ i nachiga yadexaxũ. Rũ ngẽmawa nũxũ tacuax na Cristu ya guxũguma maxũcũrũ yĩĩxũ ga Melquisedé. ⁹⁻¹⁰Rũ Abráũtaa ga Lebĩ, rũ guxũma i paigũ i Lebítaagũ ixĩgũxũ i ñuxma ngĩxũ yauxgũxũ i ngẽma dñẽru i Tupanana ùcũ, rũ nũmagũ rũ ta Abráũmaã Melquisedéna nanaxãgũ ga yema Tupanana ùxũ. Yerũ nũma ga Lebĩ rũ guxũma ga nataagũ i ñuxma Yudũgũarũ paigũ ixĩgũxũ, rũ woo ga na tauta nabuẽxũ ga yexguma, natũrũ marũ Abráũxũnewa nayexmagũ ga yexguma Melquisedé namawa Abráũpẽxegu yanguxgu. Rũ ngẽmawa nũxũ tacuax na guxũma i ngẽma paigũarũ yexera yĩĩxũ ya Melquisedé. ¹¹Rũ nuxcũmaũgũxũ ga tórũ oxigũ ga Yudũgũ, rũ Lebítaagũ ga paigũmẽxẽwa nixĩ ga nayauxgũãxũ ga Tupanaãrũ mugũ. Natũrũ pemaã nũxũ chixu rũ yexguma chi yema paigũ aixcũma yema Yudũgũxũ imexẽẽgũgu ga Tupanapexewa, rũ taxucax chima Tupana nũxũ naxuneta ga naĩ ga pai ga Melquisedérũ ixĩcũ ga tama Lebítaa ga Aráũrũ ixĩcũ. Rũ yemacax ga Tupana rũ nũxũ naxuneta ga Nane ga Ngechuchu na tórũ chogũruũ ya pai

yîixûcax. ¹²Rü yemacax ga Tupana rü yema Yudîugiarü paigüchicüüxü nayangucuchixêê ga Cristu. Rü nûma nixî i ñuxma i aixcûma Tupanapexewa tûxü yamexêêgûxü. Rü guxûma ga yema paigü rü Lebítaa nixîgü yerü yemaâcü nixî ga namuâxü ga yema mugü ga Moïché ümatüxü. Natürü nûma ga Cristu rü marü nanaxüchicüü ga guxûma ga yema. ¹³⁻¹⁴Erü meâma nüxü tacuax rü nûma ya tórü Cori ya Ngechuchu ya yima nachiga idexagücü rü tama Lebítaa nixî erü nûma rü Yudátaa nixî. Rü nüxü tacuax rü taxuûma ga Yudátaa rü pai nixî, yerü ga Moïché rü yexguma yema paigüchiga yadeaxgu rü taxuûma ga Yudátaaxü naxuneta na pai yîixûcax. ¹⁵Rü ngêmaâcü meâ nangox na Tupana iyanaxoxêêxü ga guxûma ga yema mugü ga Moïché ümatüxü ga paigüchiga. Yerü nûma ga Tupana rü tûxna nanamu ga wüxi ga naî ga pai ga yexwacaxücü ga tama Lebítaa ixîcü. Rü nûma nixî i tórü Cori yîixü ya Melquisederüü ixîcü, erü guxûma i ngêma togü i paigüarü yexera nixî. ¹⁶Rü guxûma ga yema togü ga paigü rü nangucu yerü Lebítaa nixîgü. Natürü nûma ga Cristu rü paixü ningucuchi yerü poramaa yuwa ínarüda rü guxûguma namaxêcha na tûxü nangûxêêxûcax. ¹⁷Rü ngêmacax i Tupanaârü ore i ümatüxüwa rü tórü Corichiga ñanagürü:

“Cuma rü guxûgutáma duûxûgüarü ngûxêêruü ya pai quixî Melquisederüü”,

ñanagürü. ¹⁸⁻¹⁹Rü yemacax ga Tupana rü ñoma ga naânewa nanamu ga Nane, yerü yema mugü ga paigüchiga

naxümatüxü ga Moïché rü tama poraâcü tûxü narüngûxêê yerü tama aixcûma tûxü nimexêêgü ga Tupanapexewa. Rü yemacax Nanexü namu ga Tupana na tórü pecaducax nayuxûcax na ngêmaâcü tûxü nangêxmaxûcax i maxü i taguma gûxü rü aixcûma Tupanamücügü ixîgûxûcax. ²⁰⁻²¹Rü yexguma Tupana yema togü ga paigüxü ngucuxêêgu, rü nanangucuxêêmare. Natürü yexguma Cristuxü yangucuchixêêgu na tórü ngûxêêruü ya pai yîixûcax, rü nügüégagutama inaxuneta. Rü yemacax ga yexguma Cristuxü yangucuchixêêgu rü ñanagürü:

“Choma i Cori ya Tupana rü marü cuxü chaxuneta na guxûgutáma duûxûgüarü ngûxêêruü ya pai quîixûcax. Rü ngêma rü tagutáma chanaxüchicüü erü chaugüégagu ichaxuneta”,

ñanagürü. ²²Rü ñuxma na yemaâcü nügüégagutama inaxunetaxü ga Tupana, rü nüxü tacuax na aixcûmaxûchima yema paigüarü yexera na yîixü ya Cristu erü guxûgutáma Tupanapexewa tûxü narüngûxêê. ²³Rü yema togü ga paigü rü namuxüchi, yerü niyuetanü. Rü yemacax taxucürüwama guxûguma paigü nixîgü. ²⁴Natürü ñuxma na tórü ngûxêêruü ya paixü yangucuchixü ya Ngechuchu, rü ngêmacax marü taxucaxma texé ya togue tingucuchi, erü nûma ya Ngechuchu rü tagutáma nayu.

²⁵Rü ngêmacax nixî i ñuxma i nüxü natauxchaxü na aixcûma tûxü namaxêêxü ya guxáma ya yíxema norü ngûxêêmaâ Tupanaxûtawa ngugûxe. Erü nûma ya Ngechuchu rü guxûguma namaxêcha na tûmaétüwa

nachogüxüçax. ²⁶Rü ngëmaäcü ya Ngechuchu, rü nüxıcatama nixı i pai ya tórü ngüxëëruü yıixü i Tupanapexewa. Erü nüma rü aixcüma naxüüne, rü nataxuma i chixexü i nawa, rü nangearı pecaduâx yerü taguma taxrüü pecadu naxü. Rü ñuxma rü guxüëtüwa nangëxma i daxüguxü i nañewa i Tupana íngëxmaxüwa. ²⁷Rü Ngechuchu rü tama ngëma togü i paigüerurüü nixı. Erü nümagü rü nanaxwaxe na guxü i ngunexügu Tupanacax naxünagü nađaixü na ngëmaäcü Tupana nüxü nüxü ngechaüxüçax i noxrıtama pecadugü rü guxü i duüxügüarı pecadugü ta. Natürü nüma ga Ngechuchu rü yexguma nügü inaxâxgu, rü wüxicanatama pecaducax nayu. Rü ngëma rü guxüguma name i Tupanapexewa. ²⁸Rü yema mugü ga Moıché ümatüxü, rü duüxügümarexü naxuneta na paigüerugü yixıgüxüçax. Natürü nümagü rü ta nipecaduâxgü. Natürü yemawena ga Tupana rü nügiégagu Nanexü naxuneta na tórü ngüxëëruü yıixüçax. Rü yima Nane rü guxüguma mecüxüchi ya tórü Maxëxëëruü nixı. Rü nüma rü guxüguma tüxü narüngüxëe i Tupanapexewa.

**Ngechuchu nixı ya tórü
ngüxëëruü i Tupanapexewa**

8 ¹Rü ngëma pemañ nüxü tixuxchaüxü i ñuxma nixı na tüxü nangëxmaxü ya tórü ngüxëëruü ya mexëchicü i Tupanaxütawa. Rü nüma rü Tupana Nane ya Cristu nixı. Rü daxüguxü i nañewa i Tupanaärü tügünecüwawa narıto erü guxüärü âëxgacü nixı. ²Rü ngëma

daxüguxü i nañewa i ngëma nachica i üünexü ga Tupana üxüwa nixı i taxçax ínaçaxü. Rü tama ngëma Yudügiarı paigürüü wüxi ya ípata ya duüxügü üxünewa Tupanana taxçax ínaca. ³Rü guxüma i ngëma Yudügiarı paigüeru rü nangucu na Tupanana naxägiâxüçax i âmaregü rü naxçax nadaíâxüçax i naxünagü na Tupana nüxü nüxü ngechaüxüçax i duüxügüarı pecadugü. Rü yemacax ga Ngechuchu rü Tupanana nügü naxâmارة rü duüxügüarı pecaducax nayu. ⁴Rü ñuxma i nüma ya Ngechuchu rü daxüguxü i nañewa nangëxma na ngëma tórü ngüxëëruü ya pai yıixüçax i Tupanapexewa. Rü ngëmacax tama ñoma i nañewa nixı i pai yıixü. Natürü ngëxguma chi ñoma i nañewa nangëxmagu rü tâu chima pai nixı erü ñoma i nañewa nangëxmagü i ngëma Yudügiarı paigü i Tupanana âmare ägüxü yema Moıchéarı mugü nüxü ixuxürüü. Natürü nüma ya Ngechuchu rü tama ngëmarüü nixı erü daxüguxü i nañewa nixı i nangëxmaxü na ngëma tüxü nangüxëëxüçax. ⁵Natürü ngëma puracı i ñoma i nañewa naxügüxü i ngëma Yudügiarı paigü, rü naxçax nadauxütaegümare i ngëma Ngechuchu daxüguxü i nañewa üxü. Rü ngëma nachica i nawa Tupanacax napuracıexü i ngëma paigü, rü nanaxüchicünaxägümare i ngëma nachica i Ngechuchu nawa ngëxmaxü. Rü meãma nüxü tacuax i ngëma, yerü yexguma Moıché naxüxchaügu ga Tupanapata, rü Tupana rü ñanagürü nüxü:

“iDüçax, meã nangugü i ngëma
cuaxruü ga cuxü chawéxü ga
maxpúne ga Chinaíwa! Rü

chanaxwaxe i ngëmaäcü na cunaxüxü”,
 ñanagürü. ⁶Natürü nüma ya tórü ngüxëëruü ya Cristu rü daxügxü i naãnewa nangëxma, rü ngëma aixcümaxüchi Tupanapexewa taétüwa nachogü. Rü ngëma Yudügiarü paigü rü nagu naxĩama ga yema nuxcümaüxü ga uneta ga Moiché ümatüxü. Natürü nüma ya Tupana rü marü tüxna nanaxã i wüxi i ngexwacaxüxü i uneta erü tamaã nüxü nixu na Cristu yĩxü ya aixcüma tórü ngüxëëruü ixicü. Rü nüma rü nayu na Tupanapexewa tüxü yamexëëxüçax, rü ngëma Tupanaxütawa nangëxma i ñuxma na taétüwa nachogüxüçax. Rü ngëmaäcü nüxü tadau na Tupanaärü uneta i ngexwacaxüxü rü yema nuxcümaüxü ga unetaarü yexera yĩxü na namexü. ⁷Yerü yexguma chi yema nüxĩraüxü ga uneta ga Moiché ümatüxü rü aixcüma namexgu na duüxügüxü yamaxëëxüçax, rü marü taxuçax chima tanaxwaxe i to i ngexwacaxüxü i Tupanaärü uneta. ⁸Natürü nüma ga Tupana rü nüxü nadau na tama aixcüma napexewa duüxügüxü yamexëëxü ga yema nüxĩraüxü ga uneta ga Moichéna naxãxü. Rü yemacax ga Tupana rü ñanagürü:

“Wüxi i ngunexü rü wena táxarü guxüma i chorü duüxügümaã ichaxuneta. ⁹Natürü ngëma chorü uneta i ngexwacaxüxü, rü täütama namaã nawüxigu ga yema nüxĩraüxü ga chorü uneta ga nuxcümaügxü ga perü oxigümaã nüxü chixuxü ga yexguma nüxü charüngüxëëgu

na ínachoxüxüçax ga Equituarü naãnewa. Yerü nümagü ga yema duüxügü rü tama chauga naxĩnüë rü tama nayanguxëë ga yema nüxĩraüxü ga chorü uneta, rü yemacax íchanawogü. ¹⁰Natürü ngëxguma nawa nanguxgu na wena namaã ichaxunetaxü, rü ñaäcü tá nixĩ i guxüma i Yudügiumaã ichaxunetaxü: ‘Rü tá meãma ngëma duüxügüxü nüxü chacuaxëë i chorü mugü na aixcüma naãëwa nangëxmagüxüçax. Rü choma rü tá norü Tupana chixĩ, rü nümagü rü tá chorü duüxügü nixĩgü’. ¹¹Rü guxüma i ngëma duüxügü i choxü yaxögüxü, rü aixcüma tá choxü nacuaxgü. Rü ngëmacax taxuçaxtáma tüxcüü nügümaã nüxü nixugügü i chauchiga na ngëmaäcü choxü nacuaxgüxüçax. Erü guxüma i chorü duüxügü rü aixcüma tá meã choxü nacuaxgü woo buxü rü exna yaxü. ¹²Rü tá nüxü nüxü changechaü i norü chixexügü, rü tá nüxü ichayarüngümaxüchi i norü pecadugü”,

ñanagürü ga Tupana. ¹³Rü dücax, ñuxma na Tupana ngexwacaxüxü i unetachiga idexaxü, rü ngëmawa nüxü tacuax na yema nüxĩraüxü ga uneta rü marü nangupetüchaüxü. Rü nüxü tacuax rü guxüma i ngëma marü ngupetüchaüxü, rü paxa tá inayarüxo. Rü ngëmaäcü i ngëma Yudügiarü paigü, rü marü inayarüxoxchaü na

Tupanapexewa duũxũgũxũ nangũxẽẽxũ. Erü nũma ya Tupana rü marü Cristuxũ ningucuchixẽẽ na tórü ngũxẽẽruũ yĩxũcax i napexewa.

**Tupanapata ga duũxũgũ üxũnechiga rü
Tupanapata ya daxũguxũ i naãnewa
ngẽxmanechiga**

9 ¹Rü yexguma nuxcũma Moĩchémaã yadeaxgu rü nüxna naxããgu ga yema nüxĩraũxũ ga uneta, rü Tupana namaã nüxũ nixu na ñuxãcü nanaxwaxexũ na nüxũ yacuaxũũgũxũ. Rü yexgumarüũ ta namaã nüxũ nixu na ñuxãcü nanaxwaxexũ na naxcax naxũãxũ ga wüxi ga ipata ga naxchirunaxcax na yéma nüxũ yacuaxũũgũxũcax ga paigü. ²Rü guma ipata ga naxchirunaxcax rü nitüyemachĩã. Rü yema naxmachĩã ga nüxĩra nawa ixücuxũ, rü “Nachica i Üünexũ” nixĩ ga naéga. Rü yéma nayexma ga werachica rü mecha ga pãũ ga üünexũ nagu nuxũ. ³Rü yema to ga naxmachĩã ga yema tüyemachĩãxũcaxwena üxũ rü “Nachica i Üünexũchixũ” nixĩ ga naéga. ⁴Rü yéma nayexma ga yema mecha ga uirunaxcax ga ngextã nawa yagugũãxũ ga pumara ga yixixũ ga yexguma yaguxgu. Rü yéma nayexma ta ga yema baú ga Tupanaãrũ mugü nagu namaã nanguxũgũxũ. Rü yema baú rü guxũwama uirumaã natüxüne. Rü yematama baúarü aixepewa nayexma ga wüxi ga tũxũxãcü ga uirunaxcax ga yema pãũ ga daxũwa rüyixũmaã ããcuxũ. Rü yexgumarüũ ta yema baúarü aixepewa nayexma ga Aráũãrũ caxũruũ ga rüxũxũne, rü guma nutagü ga

Tupanaãrũ mugü nagu ümatügücü. ⁵Rü yema baúetíwa nayexmagü ga yema taxre ga daxũcũãxchicũnaãxãgü ga ixãpexatũxũ. Rü naxpexatũgũmaã nayadüxétügü ga yema baúátaũ. Rü yema daxũcũãxchicũnaãxãgüarü ngãxũwa nixĩ ga nügü nangoxẽẽxũxũ ga Tupana. Natürü taxucaxma tũxcũ yexeraãcü nüxũ tixu i ngẽmachiga. ⁶Rü wüxicana yemaãcü na namexẽẽgũãxũ ga guxũma ga yema, rü ñuxũchi ga paigü rü guxũguma yema nüxĩraũxũ ga naxmachĩãgu nachocuxũ na yéma Tupana namaã nüxũ ixuxũãcũma nüxũ yacuaxũũgũxũcax. ⁷Natürü yema to ga naxmachĩãwa rü yema paigüarü ãẽxgacüxicatama nixĩ ga yexma ücuxũ. Rü tama guxũguma yexma naxücu, natürü wüxicanatama yexma naxücu ga wüxichigü ga taunecügu. Rü yexguma yexma naxücuxgu rü yéma nanange ga naxũnagü rü guma nagũmaã yema baúxũ namaxcuétü. Rü yemaãcü ga yema paigüarü ãẽxgacü rü inanaxã ga guma nagü na noxrütama pecadu rü guxũma ga duũxũgüarü pecaduxũ iyanangũmaxũcax ga Tupana. ⁸Natürü yema paigüarü ãẽxgacüxicatama nixĩ ga yema Nachica ga Üünexũchixũgu ücuxũ ga Tupana íyexmaxũwa. Rü ngẽmaãcü Tupanaã i Üünexũ tũxũ nüxũ nacuaxẽẽ na taxucürüwama yexma Tupana íyexmaxũgu nachocuxũ ga guxũma ga duũxũgü yerü yexguma nagu naxĩxgu ga yema mugü ga Moĩché ümatũxũ rü nachuxu ga yema. ⁹Rü guxũma i ngẽma pemaã nüxũ chixuchigaxũ, rü wüxi i cuaxruũ nixĩ i taxcax i yixema na ñuxma imaxẽxũ. Rü ngẽmawa nüxũ tadau rü yema ãmaregü ga Tupanana

naxãgũxũ rü yema naxũnagũ ga
 Tupanacax naðaixũ rü taxucürüwama
 yema duũxũgũxũ nimexẽẽ na aixcũma
 Tupanapexewa yamexũcax. ¹⁰Rü yema
 nuxcũmaũgũxũ ga mugũ ga ðnagũchiga
 rü axeũgũchiga rü nacũmagũchiga
 ixĩxũ, rü yema duũxũgũarũ
 düxétũxũnecaxicatama nixĩgũ. Rü
 yemacax tama yema duũxũgũxũ
 nimexẽẽ na aixcũma Tupanapexewa
 yamexũcax. Rü woo napora ga yema
 mugũ ga noxrix, natürü yexguma
 ñnanguxgu ga Cristu rü marũ yexma
 nayacuax na duũxũgũmaã naporaxũ.
¹¹Natürü i ñuxma rü marũ ñnangu ya
 Cristu. Rü nũma nixĩ i aixcũma tórũ
 ngũxẽẽruũ yĩxũ i Tupanapexewa, rü
 nagagu nixĩ i nangẽxmaxũ i maxũ i
 taguma gũxũ. Rü ngẽma nachica i
 ngextá taétũwa ñnachogũxũwa rü
 aixcũma naxũũne erũ tama guma ñpata
 ga naxchirunaxcax ga duũxũgũmare
 üxũnerũ nixĩ erũ daxũguxũ i naãnewa
 nangẽxma. ¹²Rü Cristu rü marũ
 daxũguxũ i naãnegu naxũcu i ngextá
 Tupana ñngẽxmaxũwa. Rü taxucaxma
 tũxcũũ wũxichigũ ya taunecũgu ngẽxma
 naxũcu, erũ marũ guxũguma ngẽma
 nangẽxmaẽcha. Rü yexguma yexma
 naxũcuxgu, rü tama yema nanange ga
 chibugũgũ rü wocaxacũgũgũ na
 Tupanana naxãaxũcax. Natürü nũma ga
 Cristu rü nagũtama ñnaxã na yemaãcü
 naxũtanũaxũcax ga tórũ pecadugũ rü
 tũxũ nangẽxmaxũcax i maxũ i taguma
 gũxũ. ¹³Rü yema mugũ ga Moĩché
 ümatũxũ rü ñnanagürü:

“Ngẽxguma texé yuetaxũ ñngõgũgu,
 rü taxucürüwama Tupanapata
 ya naxchirunaxcaxgu taxũcu”,

ñnanagürü. Rü yemacax ga yema
 Yudiũgũ, rü yexguma wũxi ga yuetaxũ
 yangõgũgũgu rü nanaxwaxegũ ga na
 norũ paixũtawa nagaãxũ ga wũxi ga
 woca na yema pai Tupanacax
 yamáxũcax rü na yaguãxũcax na
 yemaãcü ga guma tanimaca rü dexágu
 nagũãxũcax na yema duũxũgũxũ namaã
 namaxcuxũcax na yemaãcü nũxna
 ñnayĩxũcax ga norũ chixexũ. Natürü
 yema rü duũxũgũarũ
 düxétũxũnewaxicatama nanamexẽẽ rü
 tama norũ maxũxũ namexẽẽ. ¹⁴Natürü
 nagũ ya Cristu rü yema naxũnagũgũarũ
 yexera name erũ tórũ maxũ namexẽẽ na
 aixcũma Tupanapexewa imexũcax. Rü
 Cristu rü woo Tupana Nane na yĩxũ rü
 na nataxuxũ ga norũ chixexũ, natürü
 Tupanana nügũ naxã rü tórũ pecaducax
 nayu yerũ Naãẽ i Üünexũ nanaporaxẽẽ.
 Rü yemaãcü curuchagu nanabaxẽẽ ga
 nagũ. Rü ñuxma ya yima nagũ rü ñingu
 na tũxũ namexẽẽxũcax i Tupanapexewa.
 Rü ngẽmacax taxucaxma tanaxwaxe na
 nagu ixĩxũ ga yema mugũ ga Moĩché
 ümatũxũ ga tama tũxna naxãxũ i maxũ i
 taguma gũxũ. Rü ñuxma na Cristugagu
 Tupanapexewa imexũ, rü nũma ya
 Cristu rü tũxũ narũngũxẽẽ na
 naxũxũcax i ngẽma Tupana ya maxũcü
 tũxũ naxwaxexũ. ¹⁵Rü ñuxma na tórũ
 pecaducax nayuxũ ga Ngechuchu ya
 Cristu, rü nũma nixĩ i tórũ ngũxẽẽruũ i
 Tupanapexewa, ngẽma Tupanaãrũ
 uneta i ngexwacaxũxũ nũxũ ixuxũrũ.
 Rü ñuxma i yixema i Tupana tũxũ
 idexechixe, rü tũxũ nangẽxma i maxũ i
 taguma gũxũ ega yima Naneãxũ
 yaxõgũgu. Rü ngẽxgumarũ ta i
 guxũma i Tupanaãrũ duũxũgũ ga

nuxcuma yaxögüxü, rü nüxü nangëxma i maxü i taguma gúxü yerü Cristu nayu na norü pecaduna ínguxüxëëxüçax. ¹⁶Rü ngëxguma nayuxchaügu i wüxi i duüxü, rü wüxi i poperagu nanaxümatü na texé tá nayaxuxü i norü ngëmaxügü. Natürü ngëxguma namaüxgu i ngëma duüxü, rü taxucürüwama texé tanayaxu i norü ngëmaxügü. ¹⁷Rü ngëmacax i ngëma popera rü tama napora i ngëxguma namaüxgu i ngëma duüxü. Rü ngëxguma nayuxguxicatama nixi i naporaxü. ¹⁸Rü nüma ga Cristu rü norü yuma nixi ga Tupanapexewa tüxü yamexëëgüxü. Yerü ga Moiché rü nüxü nixu rü yexguma texé pecaduäxgu rü tanaxwaxe na tümaärü paixütawa tanagaxü ga wüxi ga naxüna na tümaégagu nayuxëëxüçax rü inabaäxüçax ga nagü na Tupana tüxü nüxü ngechaüxüçax ga tümaärü pecadu. ¹⁹Rü Moiché rü guxüma ga duüxügüpexewa nüxü nixu ga guxüma ga Tupanaärü mugü. Rü yemawena nanayaxu ga wocaxacügü rü chibuxacügü, rü dexáma nanaxüëü. Rü ñuxüchi nanayaxu ga wüxi ga naïxchacüxácü rü ñuxre ga tüaxmü ga dauxüne, rü yema naïxchacüügu nanabagümü. Rü yemama guma nagüwa nanacüe rü ñuxüchi nanamaxcuétü ga yema popera ga Tupanaärü mugü nawa yemaxü. Rü yexgumarü ta nayamaxcutanü ga guxüma ga duüxügü. ²⁰Rü ñuxüchi ga Moiché rü ñanagürü nüxü ga duüxügü:

“Tupana rü marü inaxuneta na pexü tá nangüxëëxü. Rü daa nagüma pexü chimaxcutanü i ñuxma erü ngëmaäcü nixi i

choxü namuxü na ngëmawa nüxü pecuáxüçax na aixcuma tá pexü nangüxëëxü”,

ñanagürü. ²¹Rü ñuxüchi ga Moiché rü guma nagüma nanamaxcuétü ga guma ipata ga naxchirunaxçax ga nawa Tupanaxü yacuaxüügüne. Rü yexgumarü ta nanamaxcutanü ga guxüma ga yemaxügü ga namaä Tupanaxü yacuaxüügüxü ga guma ipataarü aixepewa yexmagüxü. ²²Rü nüxü tacuax rü yema duüxügü ga yexguma pecadu naxügügu rü Tupanapexewa nügu yamexëëgüchaügu, rü norü paigüxütawa nanaga ga wüxi ga naxüna na nüxü yamáäxüçax rü inabagüxëëxüçax na Tupana tama napoxcuexüçax. Natürü ñuxma ya Tupana rü tüxü nüxü nangechaü i tórü chixexü yerü tórü pecaduçax nayu ga Ngechuchu rü nagü inanaba. Rü yexguma chi täu chima nayuxgu rü nagü inabaägu, rü taxucürüwama chima Tupana tüxü nüxü nangechaü i tórü pecadugü.

**Cristu rü nayu na
iyanaxoxëëxüçax i pecadu**

²³Rü yemacax ga Tupana rü nuxcümäxüchima Moichéma nüxü nixu na paigü duüxügüarü pecaduçax naäaixü ga naxünagü rü inabaäxü ga nagü na yemaäcü Tupana tama napoxcuexüçax ga duüxügü. Natürü i ñuxma i yixema na Tupana tüxü idexechixü, rü tüxü nangëxma i tachica i daxügüxü i naänewa yerü Nane ya Cristutama tórü pecaduçax nayu rü inanaba ga nagü. Rü yima nagü rü Tupanapexewa rü poraäcü ngëma naxünagügüarü yexera narüporamaë. ²⁴Rü

ngëmacax i ñuxma rü taxucaxma tñxcüü
guma ñpata ga naxchirunaxcax ga duñxügü
üxñegu naxücu ya Cristu na ngéma
taétüwa nachogüxcax. Erü nüma ya
Cristu rü marü Tupanaxütawaxüchi nangu
i daxüguxü i nañewa. Rü ngéma
Nanatüpezewa nangëxma i ñuxma na
ngéma taétüwa nachogüxcax. ²⁵Rü
ngëmacax i ñuxma rü taxucaxma tñxcüü
guxüguma Nanatüna nügü naxãêcha na
ngëmaäcü taxcax nayuuuxüxcax. Rü yema
Yudfugüarü paigüarü ãëxgacügü rü gúcü
ga taunecügügu guma ñpata ga üüinenegu
nachocuxü na yéma Tupanana
naxãgüãxüxcax ga guma naxünagügü.

²⁶Natürü ya Cristu, rü taxucaxma tñxcüü
gúcü ya taunecügügu Tupanana nügü
naxãêcha, erü ngëxguma chi ngëmaäcü
yixügu rü chi noxri naäne ixügügumama rü
chi marü muëxpüxcüna taxcax nayu.
Natürü ñomaüccüü ga Cristu rü marü ñoma
ga nañewa nangu na wüxicanatama nügü
inaxãxüxcax rü pecaducax nayuxüxcax.

²⁷⁻²⁸Rü ngéma na wüxicanatama nayuxü i
duñxügü naxüpa na Tupanapexewa
nangugüxü, rü yexgumariüütama ga Cristu
rü wüxicanatama nügü inaxã rü nayu na
iyanaxoxëãxüxcax i muxüma i
duñxügüarü pecadugü. Natürü wena
taxarü núma naxü. Rü ngëxguma wena
núma naxüxgu rü tama pecaduarü oxëêwa
tá núma naxü. Natürü tá núma naxü na
namaxëxëãxüxcax i guxüma i ngéma
duñxügü i aixcüma ínanguxëëgüxü.

10 ¹Rü yema mugü ga Moíché
ümatüxü rü írarüwatama yema
duñxügüxcax nanangoxëë ga ñacü tá na
naxüxü ga Cristu. Natürü ga yema mugü
rü tama aixcüma Cristurüü napora, yerü
taxucürüwama Tupanapexewa

nayamexëë ga yema duñxügü woo gúcü
ga taunecügügu Tupanacax nanadaixü
ga naxünagü na yemaäcü Tupanana
nangaicamagüxcax. Rü yemaäcü ga
yema mugü rü taxucürüwama Cristurüü
nanamaxëxëë ga yema duñxügü. ²Rü
yexguma chi yema mugü aixcüma yema
duñxügüxü imexëëgu ga Tupanapexewa,
rü tãü chima nagu narüxñüëêcha na
yapecaduãxü, rü chi nüxü narüxoe na
naxünagü Tupanacax naðaixü. ³Natürü
yema na Tupanacax naxünagü naðaixü
ga duñxügü, rü norü pecaduarü
cuaxächixëëruümare nixí ga gúcü ga
taunecügügu. ⁴Yerü guma nagü ga
yema wocagü rü chibugü rü tama
napora na iyanaxoxëãxüxcax ga
pecadugü. ⁵Rü yemacax ga Cristu ga
yexguma ñoma ga nañewa
naxüxchaügu, rü Nanatüxü ñanagürü:

“Tama cunaxwaxe na naxünagü
cuxcax naðaixü i duñxügü na
naxütanügüãxüxcax i norü
pecadugü. Natürü cunamexëë i
ñaã chaxune na ngëmamaã
chanaxütanüxcax i pecadu. ⁶Rü
tama namaã cutaãe i ngéma
naxünagü i cuxna naxãmaregüxü
rü cuxcax naðaixü rü yagugüxü
na naxütanügüãxüxcax i norü
pecadugü. ⁷Rü yemacax rü
ñacharügü: ‘Dücax, Pa
Chaunatüx, daxe chixí, rü nuã
cupexewa changëxma na
chanaxüxcax i curü ngüchaü rü
na chayuxüxcax, ngéma curü
orewa chauchiga
naxümatüxürüü’, ñacharügü”.

⁸Rü yemaäcü ga Cristu rü nüxü nixu na
Tupana rü tama aixcüma namaã

nataãêxũ ga yema na naxcax nadaiãxũ
ga naxũnagũ rü naxcax yagugũãxũ na
naxũtanügũãxũcax ga norü pecadugũ
woo yema mugũ ga Moiché ûmatũxũwa
rü duũxũgũxũ namu na naxũgũãxũ ga
guxũma ga yema. ⁹Rü yemawena ga
Cristu, rü ñanagürü ta:

“Dücax, Pa Chaunatũx, daxe chixĩ,
rü nuã cupexewa changẽxma
na chanaxũxũcax i curũ
ngũchaũ rü duũxũgũarũ
pecaducax na chayuxũcax”,

ñanagürü. Rü yemawa nüxũ tacuax na
Tupana rü marũ iyanaxoxẽãxũ na
naxũnagũ naxcax naãaixũ, yerü Nanexũ
ningucuchixẽẽ na pecaducax nayuxũ.

¹⁰Rü ñuxma na Ngechuchu ya Cristu
naxũxũ ga yema Tupanaãrũ ngũchaũ, rü
ngẽmacax nixĩ i ñuxma i Tupanapexewa
ixũünexũ i yixema. Yerü nüma ga Cristu
rü Tupanana nügũ naxã na
wüxicanatama guxããrũ pecaducax
nayuxũ. ¹¹Rü guxũma i Yudiũgũarũ
paigũ rü wüxichigũ i ngunexũgu rü
tupaucawa nangẽxmagũxũ na Tupanana
naxãgũãxũcax i naxũnagũ i naxcax
nadaiiixũ. Rü guxũguma yemaãcü
nanaxũgũxũ natürü taguma aixcũma
inayarũxo ga norü pecadugũ woo
yemaãcü na naxũgũxũãxũ. ¹²Natürü
nüma ga Ngechuchu ya Cristu rü
wüxicanatama Tupanana nügũ naxã na
guxããrũ pecaducax nayuxũcax. Rü
yemawena rü ñuxũchi daxũwa naxũ rü
Tupanaãrũ tũgũnecũwawa nayarũto,
erü guxããrũ ãẽxgacũ nixĩ i ñuxmax.
¹³Rü ngẽma nixĩ i nangẽxmaxũ
ñuxmatãta ya Tupana rü guxũma i norü
uwanũgũxũ nüxũ nayexeraxẽẽ. ¹⁴Rü
nüma ga Ngechuchu ya Cristu rü

wüxicanatama Tupanana nügũ naxã rü
nayu na guxũguma Tupanapexewa
timexũcax ya yixema Tupanacax tũxũ
yaxũünexẽẽgũxe. Rü ngẽmacax i ñuxma
rü taxucaxma tũxcũũ wena nügũ inaxã
rü nayu, yerü wüxicanatama guxũma
ningutanũxẽẽ. ¹⁵⁻¹⁶Rü Tupanaãẽ i
Üünexũ rü tũxũ nüxũ nacuaxẽẽ na
aixcũma yĩxũ i ngẽma, yerü nüma ga
Tupana rü ñanagürü:

“Ngẽxguma nawa nanguxgu na wena

ngẽma Yudiũgũmaã
ichaxunetaxũ, rü wüxi i
ngexwacaxũxũ i uneta tá nüxna
chaxã. Rü tá meã ngẽma
duũxũgũxũ nüxũ chacuaxẽẽ i
chorũ mugũ na aixcũma naãẽwa
nangẽxmagũxũcax rü guxũguma
naga naxĩnüẽxũcax. ¹⁷Rü tá nüxũ
ichayarĩngũmaxũchi i ngẽma
duũxũgũarũ pecadugũ rü ngẽma
chixexũ i naxũgũxũ. Rü tagutãma
wena nagu charũxĩnũ”,

ñanagürü. ¹⁸Rü ngẽmaãcü nüxũ tacuax
rü ngẽxguma Tupana duũxũgũaxũ nüxũ
ngechaũgu i norü pecadugũ, rü marũ
taxucaxma tũxcũũ nanaxwaxe na wena
tacũ i naxũnagũ nüxna naxãgũxũ
naxcax i pecadu.

Name nixĩ i Tupanana tangaicamagũ

¹⁹⁻²⁰Rü ngẽmacax i ñuxma, Pa
Chaueneẽgũ, rü taxucaxma tũxcũũ
tamuũẽ na Tupana ñgẽxmaxũwa
ichocuxũ na namaãxũchi idexagũxũcax.
Rü nuxcũmaxũchima rü paigũarũ
ãẽxgacũxicatama yexma naxũcu nagu
ga guma ipata ga naxchirunaxcax ga
Tupana nawa yexmane. Rü
taxucũrũwama ngexerũxũxemare yexma

taxücu. Natürü nüma ga Ngechuchu ya Cristu rü marü inayanaxoxëë ga guxüma ga yema ga yexguma curuchagu nayuxgu rü nagü inabaägu na Tupana îngëxmaxüwa tüxü yachocuxëëxüçax rü namaäxüchi idexagüxüçax. Rü woo taxucürüwama Tupanana tangaicamagü ga noxrix, natürü nüma ga Cristu rü nayu na tüxü namaxëxëëxüçax. Rü nagagu nixí i ñuxma i Tupanaxütawa ingugüxü. ²¹Rü nüma nixí i Tupanapexewa tüxü nangüxëëxü i guxäma i yixema i Tupanaärü duüxügü ixigüxe. ²²Rü ñuxma na tüxü nangëxmaxü ya tórü ngüxëëruü i Tupanapexewa, rü tanaxwaxe i aixcüma mexü i taäemaä Tupanana tangaicamagü na namaäxüchi idexagüxüçax. Rü tanaxwaxe i aixcüma tayaxögü na nüma rü tá meä tüxü nayaxuxü yerü Cristu rü taxçax nayu na tüxü iyanaxoxëëxüçax i tórü chixexü rü yemaçax marü naégagu ítabaiü. ²³Rü tanaxwaxe i aixcüma meä Cristuaxü tayaxögüecha yerü nagümaä tüxü inayanaxoxëë ga tórü chixexü. Rü ngëmacax ítananguxëë na wena taxarü núma naxüxü na Nanatüxütawa tüxü nagagüxü. Rü taguma tanaxwaxe na nüxü rüxoexü na yaxögüxü, rü bai i írariüwa. Erü Tupana ga tamaä ixunetacü na tüxü nangüxëëxü, rü aixcümaxüchi tá nayanguxëë i guxüma ga yema tamaä nüxü yaxuxü. ²⁴Rü ñuxma na ngëmaäcü tüxü nangüxëëxü ya Tupana, rü name nixí i guxüguma naxçax tadaugü na ñuxäcü wüxichigü yigü rüngüxëëgüxü na yexeraäcü yigü ingechaügüxüçax rü mexü ixügüxüçax. ²⁵Rü name nixí i guxüguma tórü

ngutaquexegüwa na íngugüüxü. Erü nümaxü rü marü nüxü narüxoe na ngutaquexewa naxüxü, rü tama tanaxwaxe na ngëxgumarüü ixigüxü. Rü ngëmacax name nixí i yigüaxü tanangüchaüxëë na ingutaquexegüxü. Rü ñuxma na nüxü icuaxü na marü yangaicaxü ya tórü Cori, rü yexeraäcü tanaxwaxe na yigüaxü nangüchaüxëëxü. ²⁶Natürü ngëxguma chi texé Cristuaxü yaxöchirexgu ga noxrix rü ñuxüchi noxtacüma nüxü tarüxoxgu, rü marü nataxuma na ñuxäcü namexëëxü i ngëma tümaärü pecadu i Tupanapexewa. ²⁷Erü ngëxguma chi ngëmaäcü noxtacüma Cristuxü tarüxoxgu, rü aixcümaxüchi tá tanayaxu i ngëma poxcu i äücümaxü i Tupana tá tüxü namaä poxcuxü rü yima üxu ya iyaurane ya nawa tá ínaguxüne i ngëma Tupanaärü uwanügü. Rü ngëxícatama nixí i tüxü ínanguxëëxü ya yíxema Cristuxü rüxoxe. ²⁸Rü nüxü tacuax rü yexguma texé tama Moíchéarü mugüga ínúgu rü nayexmagu ga taxre rü exna tomaëxpüx ga duüxügü ga tüxü daugüxü rü tüxü ixügüexü na aixcüma tama naga taxínüxü, rü äëxgacügü rü noxtacüma tüxü nimaxgü rü tama nüxü tangechaütümüügü. ²⁹Natürü Tupana rü aixcüma yexeraäcü tá nanapoxcue i ngëma duüxügü i tama Nanega ínüëxü rü yima nagü ya pecaduarü pirüüxü oexü rü Naäë i Üünexü i nüxü ngechaüxümaä guxchigagüxü. ³⁰Rü meäma nüxü tacuax rü Tupana rü tama natüçaxma ñanagürü:

“Choma tá nixí i namaä nüxü
chacuaxü na tacü tá namaä
chaxüxü i guxüma i ngëma

chixexü ügüxü. Rü aexcüma tá chanapoxcu”,
 ñanagürü. Rü yexgumarüü ta ñanagürü:
 “Choma tátama nixí i nüxna
 chaçaxü i wüxichigü i chorü
 duüxügü i norü maxüchiga”,
 ñanagürü. ³¹Rü dücax, rü aexcüma
 namaxü ya Tupana, rü ngëmacax ega
 tama naga ixñüëgu rü wüxi i
 ãücümáxüchixü nixí na namexgu inguxü
 na tüxü napoxcuxüçax. ³²Rü dücax,
 name nixí i nüxna pecuaxächie ga
 ñuxácü na yíixü ga yexguma noxri
 Cristuxü peyauxgu. Rü yexguma ga
 pema rü yema na peyaxögüxügagu rü
 poraäcü guxchaxügü pexü nangupetü,
 natürü tama Cristuxü perüxoe rü bai ga
 írarüwa. ³³Rü ñuxre ga pema rü
 duüxügü pema naguxchigagü rü
 guxápexewa pexü niçuaixgü. Rü toguax
 ga pema rü pegü ipeyaxägu na yema
 pemücügürüü ngúxü pingegüxüçax.
³⁴Rü pema rü pexü nangechaütümüügü
 ga yema petanüxügü ga yaxögüxü ga
 poxcupataüwa yexmagüxü. Rü
 taäëácüma yaxna namaã pexñüë ga
 yema tama yaxögüxü ga pexna
 napuxüxü ga perü yemaxügü. Rü tama
 naxçax pexoegaäë, yerü meäma nüxü
 pecuax rü daxügüxü i nañewa pexü
 nangëxma i ngëma perü ngëmaxügüarü
 yexera ixñü, erü tagutäma nagux. ³⁵Rü
 ngëmacax i ñuxmax, rü tama name na
 nüxü perüxoexü na Cristuaxü
 peyaxögüxü woo tacü pexü üpetügu.
 Erü marü nüxü pecuax rü Tupana rü
 aexcümáxüchi tá pexna nanaxä i perü
 ämare i maxü i taguma gúxü, erü
 Cristuaxü peyaxögü. ³⁶Rü ngëma
 guxchaxügü i pexü ngupetüxü, rü name

nixí i yaxna namaã pexñüë na
 penaxüxüçax i Tupanaärü ngúchaü rü
 penayaxuxüçax i ngëma ämare i pemaã
 inaxunetaxü. ³⁷Erü Tupanaärü ore i
 ümatüxüwa rü ñanagürü:

“Paxaxüchi tá wenaxärü núma naxü
 ya Cristu. Rü aexcüma täütäma
 nuxcü ínangu. ³⁸Natürü yixema
 tümaärü ögagu chopexewa
 mexë, rü name nixí i guxüguma
 tayaxödcüma chauxçax tamaxü.
 Natürü ngëxguma nüxü
 tarüxoxgu na tayaxöxü, rü
 choma rü täütäma tümamaã
 chataäë”,

ñanagürü. ³⁹Natürü i yixema rü tama
 ngëma duüxügü i nüxü rüxoexü i
 Tupana tá poxcuexürüü tixígü. Erü
 yixema rü ngëma yaxögüxütanüxü
 tixígü, rü ngëmacax tüxü nangëxma i
 maxü i taguma gúxü.

Törü öchiga

11 ¹Rü ñuxma rü törü ögagu nixí i
 nüxü icuáxü na aexcüma tá
 nayauxgüxü i guxüma i ngëma
 irünguxëëgüxü ga Tupana tamaã
 ixunetaxü. Rü ngëma törü ögagu nixí i
 nüxü icuáxü na aexcüma Tupana tá
 yanguxëëxü i ngëma norü uneta i
 ñuxma tauta nüxü idauxü. ²Rü ñuxre ga
 nuxcümaügüxü ga törü öxigü rü
 Tupanaaxü nayaxögü, rü yemaçax ga
 Tupana rü namaã nataäë. ³Rü ngëma
 törü ögagu nixí i nüxü icuáxü na
 aexcüma yíixü na Tupana rü norü
 oremaämare nangoxëëxü ga ñoma ga
 naäne rü üaxcü rü tauemacü rü
 woramacurigü rü ëxtagü. Rü yemaäcü
 ga Tupana, rü ngürüwa

nanangoxẽẽmare ga guxũma i ngẽma ñuxma nũxũ idauxũ. ⁴Rũ guma nuxcũmaũcũ ga Abé rü Tupanaãxũ nayaxõ. Rũ yemaçax Tupanaga naxĩnũ rü nũxna nanaxã ga wũxi ga naxũna ga Tupanacax yamáxũ. Natürü ga naẽneẽ ga Caí rü tama Tupanaga naxĩnũ rü tama nũxna nanaxã ga yema ãmare ga Tupana nũxũ naxwaxexũ. Rũ yemaçax ga Tupana rü woo tama Caímaã nataãẽ, natürü Abémaã nataãẽ rü nũxũ nixu na mecü yĩxũ yerü nayaxõ rü naga naxĩnũ. Rũ ngẽmacax i ñuxmax na woo nayuxũ ga Abé, natürü wũxi i tórü cuaxruũ nixĩ. Erü nawa nixĩ i nũxũ icuáxũ na Tupana naxwaxexũ na yaxõgũxũ rü naga ixĩnũẽxũ. ⁵Rũ Enó rü ta Tupanaãxũ nayaxõ rü naga naxĩnũ. Rũ yemaçax nixĩ ga namaxãcutama yagaãxũ na tama nayuxũcax. Rũ namüciũgũ rü taguma nũxũ inayangaugũ, yerü Tupana nayaga. Rũ Tupanaãrũ ore i ñmatũxũwa nũxũ nixu rü yexguma tauta yagaãgu, ga Enó rü nanaxũ ga yema Tupana naxwaxexũ. ⁶Natürü taxuacũma Tupana tamaã nataãẽ ega tama nũxũ yaxõgũgu. Rũ yíxema Tupanamaã ãmüciũchaũxẽ, rü tanaxwaxe na tayaxõxũ na aixcũmaxũchi nangẽxmaxũ ya Tupana rü nũma rü aixcũma tũxũ nangũxẽẽxũ ya yíxema naxcax daugũxe rü naga ñnũẽxẽ. ⁷Rũ yexguma Noémaã yadeaxgu ga Tupana, rü nũma ga Noé rü nayaxõ rü naga naxĩnũ. Rũ Tupana rü namaã nũxũ nixu rü tá na ñnanguxẽẽxũ ga mucü ga taxũchiçũ ga taguma duũxũgũ nũxũ daucü rü tá guxũwama inanguanexẽẽcũ. Rũ namaã nũxũ nixu ga na naxũãxũcax ga wũxi ga wapuru ga taxũne na tama nayuxũcax ga nũma

rü namax rü nanegũ rü naneãxgũ. Rũ Tupanaga naxĩnũ ga Noé, rü nanaxũ ga guma wapuru, rü yemaãcũ tama nayue ga nũma rü napatacũãx. Rũ yemaãcũ Tupanaãxũ nayaxõ. Natürü yema togũ ga duũxũgũ rü tama nayaxõgũ, rü yemaçax Tupana nanapoxcue. Natürü nũma ga Tupana rü Noéxũ nixu na napexewa namexũ, yerü nũxũ nayaxõ. ⁸Rũ guma tórü õxi ga Abráũ, rü Tupanaãxũ nayaxõ. Rũ yemaçax nixĩ ga naga naxĩnũxũ rü nũxna yaxũxũ ga nanatũchiũãne na nawa naxũxũcax ga yema naãne ga Tupana tá nũxna ãxũ na noxrũxũchi yĩxũcax. Rũ yemaãcũ nanaxũ ga yexguma Tupana namuxgu. Rũ nanatũchiũãnewa inaxũãchi ga Abráũ woo tama nũxũ na nacuáxũ ga ngextá tá na naxũxũ. ⁹Rũ yexguma nawa nanguxgu ga yema naãne ga Tupana namaã ixunetaxũ, rü ñoma yexma naxũãneãxũrũũmare ñpata ga naxchirunaxcaxmaãmare naxãchiũ. Rũ yexgumarũũtama nixĩgũ ga nane ga Ichaá rü nataa ga Acobu, yerü yexguma nayaegu rü Abráũrũ ñoma yexma naxĩãneãxũrũũmare nixĩgũ ga yema naãnewa. Rũ yemaãcũ nixĩgũ ga guxũma ga nũmagũ ga na woo Tupana rü namaã inaxunetaxũ ga na noxrũxũchi yĩxũcax ga yema naãne. ¹⁰Rũ yemaãcũ ga Abráũ, rü woo ñoma yexma naxũãneãxũrũũmare yéma nayexma, natürü Tupanaãxũ nayaxõchigũama, yerü nũxũ nacuax na Tupana tá daxũguxũ i naãnewa na nagaxũ nawa ya yima ñãne ya nũmatama naxũxũne ya tagutáma iyarũxoxũne. ¹¹Rũ yexgumarũũtama iyixĩ ga Abráũ namax ga Chara. Rũ woo ga na taguma

naxãxãcùchiréxũ yerü marü iyaxüchi, natürü ixãxãcü yerü iyaxõõma na Tupana rü aixcûma tá yanguxẽẽãxũ ga yema norü uneta ga tá na naxãxãcùxũ. ¹²Rü yemaãcü ga Abráũ rü woo marü yaguãxüchi na yiĩxũ, natürü düxwa nüxũ nayexma ga wüxi ga nane, rü gumawa ne naxĩ ga muxũma ga nataagü. Rü ñuxma rü ñoma ẽxtagürüü namuxüchi, rü ñoma naxnücü ya taxuacûma yaxugücürüü nixĩgü, yerü yemaãcü Abráũmaã inaxuneta ga Tupana. ¹³Natürü nümagü ga Abráũ rü Ichaá rü Acobu rü nayue, rü yemaçax tama nüxũ nadaugü ga guxũma ga nataagü i ñuxma ngẽxmagüxũ, rü tama namaã inacuaxgü ga yema naãne ga noxri Abráũmaã nüxũ yaxuxũ ga Tupana. Natürü Tupanaãxũ nayaxõgüama, rü yemaçax nüxũ nacuaxgü rü Tupana rü tá aixcûma na yanguxẽẽãxũ ga yema norü uneta ga namaã nüxũ yaxuxũ. Rü nataãëgü yerü nüxũ nacuaxgü na tãütama guxüguma ñoma ga naãnewa na nayexmagüechaxũ, rü yemaçax nüxũ nixugüe na to i nachiũãnecüãxruũmare yixĩgüxũ ga ñoma ga naãnewa. ¹⁴Rü nümagü rü yema oremaã meãma tüxũ nüxũ nacuaxẽẽ na tama ñoma ga naãneguxicatama naxĩnũẽxũ natürü ínanguxẽẽgüãxũ i to i nachica i daxüguxũ i naãnewa ngẽxmaxũ. ¹⁵Rü nümagü rü yexguma chi nanaxwaxegüga ga naxçax na nawoeguxũ ga yema naãne ga noxri nawa ne naxĩxũ, rü tãü chima nüxũ naguxcha rü chi naxçax nawoegu. ¹⁶Natürü ga nümagü rü nüxũ nangúchaũgü i ngẽma naãne i

mexẽchixũ i daxüwa ngẽxmaxũ i Tupanaxütawa. Rü yemaçax nixĩ ga Tupana ga tama naxãnexũ na nügü yaxuxũ na norü Tupana yiĩxũ. Yerü nüma ga Tupana rü naxçax nanamexẽẽ ga wüxi ga ñãne ya daxüguxũ i naãnewa ngẽxmane. ¹⁷⁻¹⁸Rü Tupana ga noxri rü Abráũmaã nüxũ nixu rü ñanagürü:

“Cune ya Ichaáwa tá cuxũ
nangẽxma i muxüchixüutama i
cutaagü”,

ñanagürü. Rü Abráũ rü nayaxõ na Tupana rü aixcûmaxüchi tá na yanguxẽẽãxũ ga yema namaã inaxunetaxũ. Rü yemaçax ga yexguma Tupana nüxũ üxgu rü Ichaáçax nüxna nacaxgu na naxçax yamáãxüçax, rü nüma ga Abráũ rü tama nanachuxu. Rü ínamemare na Tupanacax yamáãxũ ga guma nane ga nügümaã wüxicacü. ¹⁹Yerü nüma ga Abráũ rü nayaxõ na Tupanaãxũ natauxchaxũ na wena namaxẽẽẽãxũ i yuexũ. Rü yemaçax ga Abráũ rü ínamemare na Tupanacax nanexũ yamáxũ yerü nayaxõ na Tupana rü wena tá namaxẽẽãxũ. Rü aixcûmaxüchi yemaãcü Abráũçax nanaxü ga Tupana, yerü woo ñoma marü nayuxürüü nixĩ ga nane, natürü ga Tupana rü maxücü nüxna nanamu. Rü yema rü wüxi ga tórü cuaxruũ nixĩ na ñuxãcü aixcûma yaxõõxũ ga Abráũ. ²⁰Rü guma Ichaá rü ta Tupanaãxũ nayaxõ. Rü yemaçax ga yexguma marü nayaxgu, rü nayumüxẽ rü Tupanana naca na nanegü ga Acobu rü Echaúxũ nangüxẽẽxüçax. Rü yemaãcü nayumüxẽ yerü aixcûma nayaxõ na Tupana tá yanguxẽẽxũ ga yema nüxna naxçax naçaxũ. ²¹Rü guma Acobu rü ta

Tupanaãxũ²¹ nayaxõ. Rü yemacax ga yexguma marü nayaxgu rü nayuxchaũgu, rü norü caxũxũmaã nügü inachixẽẽ rü Tupanaxũ nicuaxũũ. Rü nayumüxẽ rü Tupanana naca na nataagü ga Yuche nanegũxũ nangũxẽxũcax. Rü yemaacü nayumüxẽ yerü aixcuma nayaxõ na Tupana tá yanguxẽxũ ga yema Abráũmaã inaxunetaxũ. ²²Rü guma Yuche rü ta Tupanaãxũ nayaxõ. Rü yemacax ga yexguma nayuxchaũgu, rü natanũxũmaã nüxũ nixu rü ñanagürü:

“Tataagü rü yixcúra rü tá ínachoxũ i nuã Equituanewa na nawa naxĩxũcax i ngẽma naãne ga Tupana tórü oxí ga Abráũmaã nüxũ ixuxũ. Rü ngẽxguma ngẽma naxĩxgu, rü chanaxwaxe ya chauuchinaxagü rü ta ngẽma nanana na ngẽxma yataxgüãxũcax”,

ñanagürü. ²³Rü yemawena rü mucüma ga taunecügü rü nimu ga yema duũxũgü ga Equituanewa. Rü yema nachĩũãneärü ãëxgacü, rü tama nanaxwaxe na yexeraacü yamuëtanixũ, rü yemacax nanamu na tüxũ naðaixũcax ga guxãma ga buxe ga iyatuxe ga yexwacax ibuetanixẽ. Natürü nanatü rü naẽ ga guma tórü oxí ga Moiché, rü aixcuma Tupanaãxũ tayaxõgü. Rü yemacax ga yexguma noxri nabuxgu ga Moiché, rü tomaëxpüx ga tauemacügu itayacuxgü, yerü nüxũ tadaugü na namexëchixũ rü tama naxcax tamuũẽ ga yema Equituanearü ãëxgacüarü ore ga woo na naxunagüãxũ ga na buxe tüxũ naðaixũ. ²⁴⁻²⁵Rü Moiché rü ta Tupanaãxũ nayaxõ. Rü yemacax ga yexguma marü nayaxgu

rü tama nanaxwaxe na nügü yaxuxũ na Equituanearü ãëxgacüxaci ngĩne na yĩxũ, yerü naxcax rü narümemae na natanũxũgü ga Yudfugũmaã wüxigu ngũxũ yangexũ. Rü tama nanaxwaxe na tacü ga ñoma ga naãneärü chixexũmaã nügü na nataãëxẽxũ, yerü nüxũ nacuax rü yema taãẽ rü paxaãchiruũmare nixĩ. ²⁶Rü yexgumarüü na daxũguxũ ga naãnena na yaxũxũ ga Cristu na ngũxũ yangexũcax, rü yexgumarüü ta nixĩ ga Moiché ga ãëxgacüpatana na yaxũxũ, yerü naxcax rü narümemae na natanũxũgü ga Yudfugũmaã wüxigu ngũxũ yangexũ. Natürü taxucaxma yema ngũxũgu narüxĩnũ, yerü nüxũ nacuax rü tá wüxi i ngunexũgu Tupanaxũtawana na nayauxãxũ i norü natanü. ²⁷⁻²⁸Rü yema na yaxõdxũcax nixĩ ga Tupanaga naxĩnũxũ ga Moiché. Rü yemacax ga yexguma Tupana namuxgu ga na naxũãxũ ga üpetüchiga, rü nayanguxẽẽ ga yema Tupana namuxũ. Rü nüma ga Moiché rü guxũma ga natanũxũgü ga Yudfugũxũ namu na wüxichigü ga ñpatawa yamáãxũcax ga wüxi ga carneruxaci na yemagũmaã namaxcuãxũcax ga naãxpatagü. Rü ñanagürü nüxũ:

“Ñoma i chütaxũgu rü tá Tupana

nüma Equituanewa nanamu i wüxi i norü orearü ngeruũ i daxũcũãx rü tá nanadai ya yima nüxira bucü ya Equituanecũãxgü nane i wüxichigü ya ñpatawa. Natürü ngẽxguma yima nagũmaã penamaxcuxgu i perü ñãxpata, rü tãütama pechiũgu naxücu”,

ñanagürü. Rü yemaacü ga Moiché rü Tupanaga naxĩnũ yerü nüxũ nayaxõ. Rü

yemacax ga yema orearü ngeruü ga daxücüâx rü taxuüma ga Yudüfügüñexü nimax. Rü yema na yaxõõxüçax nixí ga ínaxüxüxü ga Equituarü nañewa, rü tama naxçax namuüxü na guma Equituanearü âëxgacü tá namaã nanuxü. Rü taguma nüxü narüxo ga Tupanawe na naxüxü, yerü Tupana ya ëxügücüarü ngüchäü naxü. ²⁹Rü yema duüxügü ga Moïchéwe rüxüxü rü ta nayaxögü. Rü yemacax ga yexguma yema Taxtü ga Dauchiüxüwa nangugügu, rü yema dexá rü nüguna nixígachi, rü nipaaneächi, rü yéma nichoü. Natürü yexguma yema Equituanecüâx ga churaragü ga nawe ngëgüxü nawe ichoügu, rü yexma nayiama, yerü wenaxäri nüguna naxí ga yema dexá. ³⁰Rü yexguma guma ñäne ga Yericüwa nangugügu ga yema duüxügü, rü taxucüriuwama nichocu, yerü guxüwama naxäxtapüx. Natürü Tupanaäxü nayaxögü, rü yemacax Tupanaga naxüñë rü 7 ga ngunexü nüxü ínichoeguächitanüciü, yema Tupana namaã nüxü ixuxüriü. Natürü yexguma norü 7 ga ngunexüwa nanguxgu, rü nüëchama niwaxgütapüx, rü yemaäcü nichocu. ³¹Natürü yema nge ga Yericücüâx ga Raá, rü woo chixri imaxü ga noxrix, natürü yexguma yéma nangugügu ga yema taxre ga Yudüfügü ga bexma ngugütaewa yéma ñü, rü ngüma iyixí ga nüxü nangüxëxü. Rü yemacax tama yema togü ga Yericücüâx ga tama Tupanaga ñnüëxüriü iyu, yerü Tupanaäxü iyaxõ. ³²¿Rü ñuxma rü tacü i togü i duüxügüchigaxü tá pemaã chixuxü? Rü changechica na pemaã nüxü chixuxüçax i nachiga ga yema nuxcümaügüxü ga âëxgacügü ga Yedeü rü Bará rü Chaüchóü rü Yeté rü Dabí rü Chamué, rü guxüma ga

nuxcümaügüxü ga Tupanaärü orearü uruügü. ³³Rü yema na yaxögüäxüçax nixí ga Tupana nüxü rüngüxëxü. Rü yemaäcü to ga nachüñänegüarü âëxgacügüxü narüporamaëgü, rü meäma norü duüxügümaã inacuaxgü rü aixcüma nanayauxgü ga yema Tupana namaã ixunetaxü. Rü yemacax ga yexguma woo aitanügu yataxcuchigüägu, rü taxuüma namaã naxü ga aigü yerü Tupana nüxna nadau. ³⁴Rü yexguma norü uwanügü üxüxetüwa yawocuxgu, rü taxuüma nüxü naxüpetü rü tama nixae, yerü Tupanaäxü nayaxögü rü nüma rü nüxna nadau. Rü yexguma togü taramaã nadaixchaügu, rü Tupana nüxü narüngüxëë na taxuüma nüxü üpetüxüçax. Rü yexguma naturaegu rü norü uwanügü nadaixchaügu, rü Tupana nanaporaexë. Rü yexguma to ga nachüñänearü churaragümaã nügü nadaixgu, rü yema togü ga churaragüxü narüyexeragü. ³⁵Rü nayexma ga ngexügü ga yuexacüxü, natürü yema naxäcügü rü wenaxäri ñnarüdagü yerü Tupanaäxü nayaxögü. Natürü nayexma ga togü ga poraäcü ngüxü ingegüxü yerü norü uwanügü yemaäcü namaã nachopetü na Tupanaxü ñnataxgüxüçax. Natürü ga nümagü rü tama Tupanaxü ñnataxgü rü yemacax nayue, yerü naxçax rü narümemae nixí na wena namaxëxü rü nayauxgüäxü i ngëma maxü i taguma gúxü. ³⁶Rü nayexma ta ga ñuxre ga togü ga yaxögüxü ga duüxügü nüxü cügüexü, rü yaçuaixgüxü, rü cadenamaã yanaixgüxü, rü poxcupataügu nawocuxü. ³⁷Rü ñuxre ga nümagü rü togü nutamaã ñanamuxüchigü rü yemaäcü nanadai. Rü ñuxre ga nümagü rü togü nayawäixyegü rü nayue. Rü ñuxre ga nümagü rü togü

ngúxũ nũxũ ningexẽẽgũ na Tupanaxũ
 ínataxgũxũcax. Rũ ñuxre ga nũmagũ rũ
 togũ taramã nanadai. Rũ ñuxre ga
 nũmagũ rũ nu ne nanaxĩmare rũ
 carneruchaxmũũ rũ
 chibuchaxmũũmaãmare nixãxchiru. Rũ
 taxuũma nũxũ nayexma, rũ nachixẽẽgũ
 yerũ norũ uwanũgũ rũ chixri namaã
 nachopetũ. ³⁸Rũ ñoma ga naãnecũãx rũ
 naxchi naxaie, natũrũ Tupana rũ nũxũ
 nangechaũ. Rũ ñoma ga naãnewa rũ norũ
 uwanũgũchaxwa nu ne nanaxĩmare ga
 taxũema íxãpataxũwa. Rũ ngũrianegu
 nĩpexũtanũmare yerũ nangepatagũ . ³⁹Rũ
 guxũma ga yema nuxcũmaũgũxũ ga
 duũxũgũ rũ woo norũ ôgagu Tupana
 namaã na taãẽxũ, natũrũ taxuũma ga
 nũmagũ rũ guxũxũma nadau ga yema
 mexũgũ ga Tupana namaã ixunetaxũ. ⁴⁰Rũ
 yemaãcũ namaã nangupetũ ga yema
 duũxũgũ, yerũ ga Tupana rũ tagu
 narũxĩnũ rũ tama nanaxwaxe na nũxĩra
 nũxĩca yamexẽẽgũãxũ, natũrũ nanaxwaxe
 na tamaã wũxigu yamexẽẽgũãxũ. Rũ
 ñuxma i yixema na yaxôgũxũ, rũ yema
 nuxcũmaũgũxũ ga duũxũgũrũ Tupanaãrũ
 duũxũgũ tixĩgũ, yerũ Nane ya Ngechuchu
 rũ guxãcaxma nayu. Rũ wũxi i ngunexũ rũ
 tá taxcax núma naxũ na nũgũxũtawata tũxũ
 nagagũxũcax na ngẽma
 ingẽxmagũechaxũcax.

Name nixĩ i Ngechuchucũmagu taxĩ

12 ¹Rũ ñuxma na nũxũ icuáxũ na
 ñuxãcũ aixcũma Tupanaãxũ
 yaxôgũãxũ ga guxũma ga yema
 nuxcũmaũgũxũ ga duũxũgũ, rũ ngẽma
 rũ wũxi i tórũ cuaxruũ nixĩ na ñuxãcũ
 Tupana naxwaxexũ na naxcax imaxẽxũ.
 Rũ ngẽmacax i ñuxmax, irũ ngĩxã nũxũ

tarũxoe i guxũma i ngẽma pecadu i tũxũ
 ítũxẽẽxũ rũ tũxũ naguxchaxẽẽxũ na
 meã yaxôgũxũ! iRũ ngĩxã paxa naxcax
 tadaugũ na meã Tupanacax imaxẽxũ rũ
 guxũguma aixcũma naxũxũ i ngẽma
 tũxũ nanaxwaxexũ! ²Rũ name nixĩ i
 tanangugũ na ñuxãcũ namaxũxũ ga
 Ngechuchu rũ nagu taxĩ i nacũma. Yerũ
 nũma nixĩ ga nuxcũma nagu naxĩnũxũ
 na ñuxãcũ tórũ ôgagu tá tũxũ
 namaxẽẽxũ rũ nũma nixĩ i tũxũ
 nangũxẽẽxũ na aixcũma meã
 yaxôgũechaxũcax na ngẽmaãcũ
 naxũtawata ingugũxũcax. Rũ nũma rũ
 tama nũgũ nachuxu na curuchawa
 ngũxũ yangexũ, rũ tama nagu narũxĩnũ
 ga yema ãne na yangexũ, natũrũ
 nataãẽxũchi yerũ nũxũ nacuax na
 yemawena rũ tá muxũma i duũxũgũ
 nayauxgũxũ i maxũ i taguma gũxũ. Rũ
 ñuxma rũ Tupanaãrũ tũgũnecũwawa
 narũto na ngẽma guxããrũ ãẽxgacũ
 yĩxũcax. ³Rũ name nixĩ i penangugũ rũ
 nagu perũxĩnũe na ñuxãcũ ga
 Ngechuchu rũ yaxna namaã naxĩnũxũ
 ga yema ngũxũ ga nũxũ yangexẽẽgũxũ
 ga yema duũxũgũ ga pecaduãxgũxũ. Rũ
 nũma ga Ngechuchu rũ yemaãcũ yema
 ngũxũmaã yaxna naxĩnũ na pema rũ
 tama nũxũ perũchaxũcax rũ tama nũxũ
 perũxoexũcax na nũxũ peyaxôgũxũ. ⁴Rũ
 ñuxma i pema na peyaxôgũxũ, rũ ngũxũ
 pingegũ erũ pecaduxũ perũxoe. Natũrũ
 taxũema ga petanũwa rũ yemacax
 Cristurũ yuwa tangu. ⁵Rũ name nixĩ i
 nũxna pecuaxãchie i norũ ore ya
 Tupana i namaã pexũ yaxucyxẽgũxũ i
 ñuxma na naxãcũgũ pixĩgũxũ. Erũ
 ngẽma norũ ore i ñumatũxũwa rũ
 ñanagũrũ:

“Pa Chaunex, itáxú i nüxü cuxoxü i ngëxguma cuxü icharüwëxächixëëgu! iRü tâxú i cuyarümaxächixü i ngëxguma cuxü chaxucuxëgu! ⁶Erü nüma ya Cori ya Tupana rü tüxü inayarüwëxächixëë ya yíxema tüxü nangechaüxë. Rü tüxna nanaçuaixca ya yíxema naxäcüxü tüxü nayaxúxe, na ngëmaäcü tüxü nanguxëëxüçax na ñuxäcü nanaxwaxexü na naxçax tamaxüxü”,

ñanagürü. ⁷Rü ngëmacax i pemax, rü name nixi na yaxna namaa pexinüëxü i ngëxguma Tupana pexna naçuaixcagu. Erü ngëxguma ngëmaäcü pema yixigu, rü pexü nüxü nacuaxëë na aixcüma naxäcügü pixigüxü. Erü guxüma i papa rü inayanawëxächixëë i ngëma aixcüma naxäcügü ixigüxü. ⁸Natürü ngëxguma chi Tupana tama pexü iyarüwëxächixëëgu, ngëma guxüma i naxäcügüxü iyanawëxächixëëxürü, rü ngëmawa tá nüxü pecuax na tama naxäcügüxüchi pixigüxü, rü ngenatüxü pixigüxü. ⁹Rü wüxichigü i yixema ga yexguma ibuegu, rü tanatügü rü tüxü taxucuxëgü, rü yixema rü tûmaga taxinüë rü tüxü tangechaügü. Rü ngëmacax i ñuxma rü yexeraäcü tanaxwaxe na naga ixinüëxü ya Tanatü ya daxügücü na ngëmaäcü nayaxuxüçax i maxü i taguma gúxü. ¹⁰Rü tanatügü rü wüxi i paxaächixamare tüxü taxucuxëgü na tûma tanaxwaxegüxüäcüma imaxëxüçax. Natürü ya Tupana rü aixcüma tóru mexüçax nixi i tüxü iyanawëxächixëëxü na naxrüü ixüünegüxüçax. ¹¹Rü

aixcüma tama tataaëgü i ngëxguma Tupana tüxü iyarüwëxächixëëgu, erü tüxü nangux. Natürü ngëmawena i ngëxguma naga ixinüëgu rü yanguxëëgu i ngëma tamaa nüxü yaxuxü, rü aixcüma tataaëgü.

Naxäücüma na tama Tupanaga ixinüëxü

¹²Rü ngëmacax i ñuxma na ngúxü pingëgüxü rü pipaexü na Tupanawe perüxixü, rü name nixi i pegü peporaexëëama na noxrirüütama meã peyaxögüxüçax. ¹³Rü name nixi i naxçax pedaugü na Tupana pexü naxwaxexüäcüma aixcüma meã pemaxëxü, na yíxema ñuxma tama meã yaxögüxe rü meã tayaxögüxüçax. ¹⁴iRü naxçax pedaux na guxü i duüxügümaã pemecümaxü! Rü ngëxgumarüü ta name nixi i naxçax pedau na Tupanapëxewa naxüünexü i perü maxü. Erü yíxema tama Tupanapëxewa üünexë rü täütama tóru Corixü tadau. ¹⁵iRü pegüna pedaugü na taxúema nüxü oxüçax i ngëma ngüxëë i Tupana tüxü nangechaüäcüma tüxna äxü! Erü tama tanaxwaxe na texé petanüwa Cristuchi aixü rü ngëmaäcü togüxü chixexümaã taxucuxëxü na Cristuna tixügachixüçax. ¹⁶Rü tama name i texé i petanüwa rü na i ngëma na itapexü. Rü tama name na texé tûmaärü ngëmaxüçax Tupanaxü na oxü. Rü yemaäcü nanaxü ga guma nuxcümaäcü ga Acobueneë ga Echaü. Yerü yexguma nataiyagu rü wüxi ga õnacax nüxü naxo ga guxüma ga yema nüxna üxü ga nanatü chi nüxna äxü. ¹⁷Rü pema nüxü pecuax rü yemawena ga yexguma nayauxchaüägu ga yema noxri nüxna üxü, rü marü

taxucürüwama nanayaxu, yerü marü naëneë ga rübumaëcuna tanaxã ga nanatü. Rü nüma ga Echaü rü woo poraäcü naxaxu, natürü marü taxucürüwama ñuxäcü nanayaxu. Rü ngëmawa nüxü tacuax na ñuxäcü naxäücümaxü na tórü ngëmaxüçax Tupanaxü ixoxü. ¹⁸⁻²¹Rü nuxcüma ga tórü oxigü ga Moïchéwe rüxixü, rü nüxü naxĩnüë ga Tupanaga ga yexguma nüxü yangaicagügu ga guma maxpüne ga Chinaügu äégane. Rü nüxü nadaugü ga na yayauraxü ga guma maxpüne rü poraäcü naxëanexü rü poraäcü buanecü ixüxü rü yabaxbexanexü rü yaduruanexü. Rü poraäcü namuüë ga yema duüxügü, yerü nüxü naxĩnüë ga wüxi ga corneta ga tagane rü Tupana ga tagaäcü yéma ñacü:

“Ngëxguma chi wüxie i petanüwa daa maxpünewa üxgu irü noxtacüma nutamaã tüxü ípemuxüchiäcüma tüxü pimá! Rü woo wüxi i pexüna yixígu irü ngëxgumarüü ta ípenamuxüchiäcüma peyamá!”

ñanagürü. Rü yexguma yadeaxgu ga Tupana, rü poraäcü namuüë ga yema duüxügü. Rü norü muümaã Tupanaxü nacaaxügü na íyachaxächixüçax ga namaã na yadexaxü. Rü yema na poraäcü naxäücümaxüchixü ga yema nüxü nadaugüxü, rü yemacax nixí ga nümatama ga Moïché ga ñaxü:

“Chorü muümaã chidurux i ñuxmax”,

ñaxü. Rü yemaäcü nixí ga namaã nangupetüxü ga yema duüxügü ga Moïchémaã nayauxgüxü ga yema nüxíraüxü ga Tupanaärü mugü. Natürü i

pemax, Pa Chaueneëgiix, rü tama yemaäcü pexü naxüpetü ga yexguma penayauxgügu ga Tupanaärü ore i ngexwacaxüxü i Cristuchiga ixixü. ²²Rü ñuxma i pema rü taxuçaxma pemuüë, yerü ga Cristu rü taxçax nayu na Tupana ya guxüguma maxücüxütawa tüxü nagagüxüçax, na guxüguma norü ñäne ya daxügune ya Yerucharéügu äéganewa ingëxmagüxüçax. Rü ngëma tá tangutaquëxegü namaã i ngëma muxüchixüma i norü orearü ngerüügü i daxüçüãx na wüxigu namaã Tupanaxü icuaxüügiüxüçax. ²³Rü ñuxma i pemax, rü marü natanüxügü pixigü i guxüma i ngëma togü i duüxügü i Tupanaärü poperawa ngoxëgagüxü. Rü marü naxçax pexí ya Tupana ya yima guxānatáma cacü. Rü marü natanüwaama pexügü i guxüma ga yema duüxügü ga mecümagüxü ga yuexü ga Tupana imexëëgiüxü. ²⁴Rü marü naxçax pexí ya Ngechuchu ga taxçax yucü na tüxü namaxëxëxüçax, ngëma Tupanaärü uneta i ngexwacaxüxü tamaã nüxü ixuxürüü. Rü nagümaã pexü nayayauxgü ga perü chixexügü na aixcüma Tupanapexewa pixüünegüxüçax. Rü guma nagü ga taxçax ibacü rü tama guma nuxcümaücü ga Abëgürüü nixí. Yerü guma Abëgü na inabaxügagu rü naëneëxü napoxcu ga Tupana. Natürü Cristugü i baxügagu Tupana tüxü nüxü nangechaü i tórü pecadugü. ²⁵Rü ngëmacax name nixí i pexuäëgü na tama nüxü pexoexüçax ya yima Tupana ya ñuxma tamaã idexacü. Rü dücax yema nuxcümaügiüxü ga tórü oxigü ga Moïchéwe rüxixü rü taxucürüwa Tupanachaxwa nibuxmü na tama napoxcueäxüçax ga yexguma Tupanaxü naxoegu rü tama naga naxĩnüëgu ga

yexguma Moichéwa Tupana
yaxucuxëgügu. Rü yema na taxucürüwa
Tupanachaxwa yabuxmüxü ga nümagü, rü
yexeraäcü tüxü naguxcha i yixema na
naxchaxwa ibuxmüxü ega tama naga
ixñüëgu i ñuxma na Cristuwa tüxü
yaxucuxëgüxü i nüma ya Tupana i
daxügüxü i nañewa ngëxmacü. ²⁶Rü
yexguma Moichéwe naxixgu ga tórü oxigü,
rü Tupana rü nagamaä nayaduruxanexëë.
Natürü i ñuxma rü ñanagürü:

“Wena táxarü chayaduruxanexëë.

Natürü ngëxguma ngëmaäcü
chanaxüxgu rü täütáma ñoma i
nañexíca chiduruxëë, natürü
üaxcü rü woramacurigü rü
ëxtagü rü tá ta
chayaduruxgüxëë”,

ñanagürü. ²⁷Rü yema na:

“Wena táxarü chayaduruxanexëë”,
ñaxü, rü ngëmawa nüxü tacuax rü
guxüma ga yema naxüxü i tama
guxügucax ixixü, rü Tupana tá
inayanaxoxëë na ngëma guxügucax
ixixüicatama na iyaxügüxücax. ²⁸Rü
ngëma na tórü äëxgacü na yixü ya
Tupana, rü guxügucax nixí, rü tagutáma
inayarüxo na noxrü ixigüxü. Rü
ngëmacax name nixí na Tupanana moxë
ixägüxü, rü nüxü ingechaügüäcuma rü
nüxü imuüëäcuma nüxü icuaxüügüxü,
ngëma nüma nanaxwaxëxürü. ²⁹Erü
tórü Tupana, rü ñoma wüxi ya üxürü
aixcuma inayanaxoxëë i guxüma i tórü
chixexü.

Ñuxäcü Tupanaxü tataäëxëë

13 ¹Rü ñuxma rü tama name na
nüxü perüchäuxü na
wüxichigü pegü pengechaügüxü ñoma

peeneëxü pengechaüxürü. ²Tama
name na nüxü ipeyarüngümaëxü na
meäma penayaxuxü i ngëma duüxügü i
pepatawa ngugüxü. Erü nüxü tacuax rü
nümäxü ga yemaäcü naxügüxü rü
ñuxguacü rü tama nüxü nacuäácuma
bexma Tupanaärü orearü ngeruügü i
daxüçüäxü meä nayauxgü. ³Rü name
nixí i nüxna pecuaxächie i ngëma
duüxügü i poxcuexü, ñoma pema rü ta
naxrüü pepoxcuexürü. Rü
ngëxgumarü ta name nixí nüxna
pecuaxächie i ngëma duüxügü i togü
ngúxü nüxü ingexëëgüxü, erü ngürüächi
tá ta ngëmaäcü pexü nangupetü. ⁴Rü
ngëma yatügü i ämaxü rü name nixí i
meä naxmaxmä namaxë rü tüxü
nangechaügü. Rü ngëxgumarü ta i
ngexügü, rü name nixí i meä natemaä
namaxë rü nüxü nangechaügü. Erü
Tupana rü aixcuma tá nüxna naca rü tá
nanapoxcue i ngëma duüxügü i naí i
ngemaä rü exna naí ya yatümaä ipexü.
Rü ngëxgumarü tá ta tüxü napoxcue
ya guxäma ya yixema ngemäxácuma rü
ngeteäcuma tügümaä maxëmarexe. ⁵Rü
tama name na diërugama perüxñüëxü.
Rü name nixí i namaä petaäëgü i ngëma
marü pexü ngëxmaxü. Yerü Tupana rü
ñanagürü:

“Tagutáma cuxna chixü, rü

tagutáma cuxü íchatax”,

ñanagürü. ⁶Rü ñuxma na nüxü icuáxü
na ngëmaäcü tamaä inaxáüxü, rü
ngëmacax tama taxäne na ñagüxü:

“Nüma ya Cori nixí ya choxü

rüngüxëëcü. Rü ngëmacax

taxucaxma chamuü. Erü

taxucürüwama texé tacü rü

chixexü chomaä taxü”,

ñagüxü. ⁷Rü name nixĩ i nüxna pecuaxächie ga yema perü dauruügu ga noxri pemaã icuáxü rü pemaã nüxü ixugüxü ga Tupanaãrũ ore. Rü name nixĩ i nagu perüxĩnüẽ ga na ñuxácü meã namaxẽxü pepexewa rü ñuxácü meã yaxõgüácüma nayuxü. Rü name nixĩ ga nüma yaxõgüãxürü meã peyaxõgü i pemax. ⁸Rü nüma ya Ngechuchu ya Cristu rü guxüguma nayanguxẽẽ i ngẽma tamaã nüxü yaxuxü. Rü nuxcüma rü nayanguxẽẽ ga norü ore, rü ñuxma rü ta nayanguxẽẽ. Rü guxügutáma ngẽmaãcü nixĩ. Rü ngẽmacax tanaxwaxe na aixcüma nüxü yaxõgüxü. ⁹Rü tama name i peyaxõgü i ngẽma ngxẽẽtaegü i tama toma pexü namaã tangüxẽẽxü i tama Tupanaãrũ ixigüxü. Rü nuxcüma rü nagu taxĩ ga yema mugü ga Moiché ümatüxü ga tüxna nachuxuxü na tacü ixixü rü tacü ingõxü. Natürü yema mugü rü taguma tüxü naporaexẽẽ ga na Tupanacax imaxẽxü. Rü ngẽmacax tanaxwaxe na Tupana ya tüxü ngechaücüwa na nayaxuxü i tórü pora na aixcüma naxcax imaxẽxüçax. ¹⁰Rü ngẽma duüxügu i Moichéarü mugügu ixü, rü Tupanacax naxüna nadai na tama napoxcueãxüçax naxcax i norü pecadu. Natürü tama nüxü nayaxõgü ya Cristu ga tórü pecaduçax yucü. Rü ngẽmacax taxucüriwama taxrüü nanayauxgü i ngẽma ngüxẽẽ i Cristu nüxna uaxüxü. ¹¹Rü ngẽma duüxügiarü paigüarü ãëxgacü, rü tupaucawa nanange ya nagü i naxümagü na Tupanana naxããxüçax na tama Tupana napoxcuexüçax i ngẽma duüxügu. Natürü naxünegü i ngẽma naxümagü, rü ñañearü ñxpemawa nayanagü. ¹²Rü yexgumarüü ta ga Ngechuchu rü ñañearü ñxpemawa ngüxü ninge rü nayu na nagümaãtama Tupanacax yaxüünegüxẽẽãxüçax i duüxügu. ¹³Rü

ngẽmacax i yixema, rü name nixĩ i nüxna tixigachi i ngẽma mugü ga Moiché ümatüxü, rü name nixĩ i Ngechuchuçax taxĩ. Rü woo duüxügu tüxü cugüegu, yema Ngechuchuxü na nacugüexürü, rü name nixĩ i naxrüü yaxna namaã taxĩnüẽ. ¹⁴Erü yixema na yaxõgüxü, rü tãütáma ñoma i naãne i paxa tá gúxüwa tangẽmagüecha. Erü daxüguxü i naãnewa tüxü nangẽxma i tachica. Rü ngẽma tá tangugü na guxügutáma Tupanamaã ingẽxnagüechaxüçax. ¹⁵Rü ngẽmacax tanaxwaxe i Ngechuchu ya Cristuarü ngüxẽẽmaã guxüguma Tupanaxü ticuaxüügu. Rü ngẽma na taaxmaã nüxü icuaxüügu, rü ngẽma nixĩ i ñmare i mexü na nüxna naxãxü. ¹⁶IRü tãxü i nüxü ipeyarüngümaẽxü na togüxü perüngüxẽẽxü rü namaã pengauxü i perü ngẽmaxügu! Erü ngẽma nixĩ i ñmare i Tupanana pexãxü i aixcüma namaã nataãẽxü. ¹⁷IRü naga pexĩnüẽ i ngẽma perü dauruügu i pemaã icuáxü, rü penaxüx i ngẽma pemaã nüxü yaxuxü! Erü nümagü rü Tupanapexewa pexna nadaugü na meã pemaxẽxüçax erü nüxü nacuaxgü na Tupana tá nüxna çaxü i nachiga na ñuxácü pexna nadaugüxü. Rü name nixĩ i meã namaã pemaxẽ i ngẽma perü dauruügu na wüxi i taãẽ na yĩxüçax i ngẽma norü puracü rü tama wüxi i norü guxchaxü na yĩxüçax. Erü ngẽxguma chi wüxi i norü guxchaxü yixügu i ngẽma norü puracü na pexna nadauxü, rü pema rü chi taxüüma i mexü nawa peyaxu i ngẽma norü puracü. ¹⁸Rü tanaxwaxe na toxçax peyumüxẽgüxü. Erü toõewa nüxü tachuax na aixcüma meã tayanguxẽẽxü i ngẽma puracü i Tupana toxna axü rü tanaxwaxe na guxüguma ngẽmaãcü tanaxüxü. ¹⁹Rü ngẽma guxüãrü yexera pexna naxcax chaçaxü nixĩ

na peyumüxëgüxü na Tupana paxa pexçax
choxü taeguxëëxüçax.

**Yema duüxügüxü narümoxe rü naxçax
ínaca na Tupana nüxü rüngüxëëxü**

²⁰⁻²¹ Rü ñuxma chanaxwaxe i poraäcü
pexü narüngüxëë ya Tupana ya tórü
taäëxëëruü rü tórü ngüxmüëxëëruü ixücü. Rü
nüma nixi ga yuwa ínadxëëxü ga tórü Cori
ya Ngechuchu ya Cristu ya guxüma i
yaxögüxüärü dauruü ya guxäärü yexera
ixücü. Rü ñuxma na curuchagu taxçax
nabaaxü ga guma nagü ga tüxü nüxü
cuaxëëcü na ñuxäcü guxüguma tüxü
nangechaüxü ya Tupana, rü chanaxwaxe na
nüma ya Tupana pexü yamexëëgüxü rü
pexü nangüxëëxü na aixcüma guxüma i perü
maxüwa pimexüçax. Rü ngëxgumarüü ta
chanaxwaxe na Ngechuchu ya Cristuwa tüxü
nangüxëëxüçax ya Tupana na nüma

nanaxwaxexüäcüma ixügüxüçax. Rü ñuxma
tanaxwaxe i guxüguma yima Cristuxü
ticuaxüügü. Rü ngëmaäcü yï. ²²Pa
Chaueneëgi, pexü chacaxü na yaxna
namaä pexiniüxü i ñaä noxretama i ore i
pexü namaä chataäëxëëxü rü pexü namaä
chaxucuxëxü. ²³Rü chanaxwaxe na nüxü
pecuaxü rü taeneë ya Timutéu rü marü
ínanguxuchi ga na napoxcuxü. Rü ngëxguma
paxa nuä chauxütawa nanguxgu, rü tá
ngëma petaniüwa chanaga i ngëxguma pexü
íchayadauxgu. ²⁴iRü nüxü perümoxeëgü i
guxüma i ngëma perü dauruügü i pemaä
icuaxü! iRü ngëxgumarüü ta nüxü
perümoxeëgü i guxüma i togü i taeneëgü i
yaxögüxü! Rü taeneëgü i Itárianewa
ngëxmagüxü rü ta pexü narümoxeëgü. ²⁵iRü
Tupana poraäcü pexü rüngüxëëxü i guxäma i
pemax! Rü ngëmaäcü yï.

Rü nuäma pexna.